

TEOSO ATI KAKAMINA ME TAMINEMETEMONE
AMAKE.

Histórias dos Profetas

Língua Jarawara

TEOSO ATI KAKAMINA ME TAMINEMETEMONE
AMAKE.

Histórias dos Profetas

Língua Jarawara




**Sociedade Bíblica
do Brasil**

As ilustrações são usadas com a permissão de
©1978 David C. Cook Publishing Co.


Edição Digital
Revista 2016

Composto pela
Associação Internacional de Linguística SIL – Brasil
Anápolis – GO

Saromao yama kikiha tohehimatamonaka, ohariari, yama nafi. Bara me ka yama one me ta nemetemoneke, Saromao ni ya, mera nofehibonaha. Bara me nafi Saromao nakomehemetemoneke, hinaka saotato me kiti karo.



Yama we one ya Saromao
tokehimatamonaka,
Teoso taboro ya, Sibiyao ya,
bani mera tabasi
nebonaha, me ta hinahabone mati,
Teoso ni ya.



Yama soki ya Saromao amo ne Teoso watari awehimatamonaka. Teoso ati yana nematamonaka, Saromao watari ati nematamonaka. "Saromao himata tinofari, ta onahabana, tiwa ni ya?" Teoso ati nematamonaka, Saromao watari ati nematamonaka. Saromao ati yana nabisematamonaka, watari ati nematamonaka.

"Teoso yama onofa okere, ta tinahabana, owa ni ya. Tiwa onofa oke, ha tiwa.

Yama owatowabone onahara oke. Tiwati ihi towisawa amose ohahabone

onahara

oke, hine ya," ati nematamonaka, wata ya. Saromao ati amosematamonaka, Teoso ni ya. Teoso ati ehene Saromao towisawa amose totoha tohehimatamonaka, waha.







Saromao himata nima ati raba?

Yimawa tekamahi,
yimawa.

Himata Saromao
ebe neba yimawa ini
hiri nara?



Te famaha te ka inamatewemona te
ati na inamatewe wisi
okanikimahabana oke. Kote tiha,
kote tiha, tinehibanaka,
bisa.



Ee, wisi
tikanikimaho.

Hiwa naka. Wisi
nakosarama tinaho. Hine
inamatewe ya famake.
Ahabarayaho, yanehibana.

Saromao ati yana nematamonaka.

Hahi mati amake hari,
ahabarehibona ati naro.
Biti ta tinamaho
fare mati ni ya.



Saromao ati
amosematamonaka, me ni ya,
me nafi.

Saromao
yama watoka.

Teoso ati ehene tohe
awaka. Teoso
hikanawane awaka,
yama watohibana.



Saromao Teoso taborobona hiri nebona ati nematamonaka, waha. Saromao nanarifa yosehimatamonaka, Tiro ka towisawa aate nebonaha, awa ta nebonaha. Tiro ka towisawa inomatamona amaka, Irao.

Irao setera ta tinahabone tike, Teoso taborobonaha, Serosare kari, Saromao ati ehene.




Tafi onofate amaka. Biti onofa oka, waha, bisa. Setera ta onahabana oke, hinaka seterabana. Aate tiyaho, tiriko ta nebana. Orifa fehe toha, nabanake.

Setera me ka nemetemoneke, Tiro beheri ya.



Awa me towakamehemetemoneke ma witi ya.
 Awa me hiri nemetemoneke, kafowabonehe,
 towakisahabonehe, ma ya.



Awa me towakisa Serosarei yabori ya awa me towakimisamemetemoneke.
 Faya awa me towakamehemetemoneke, Serosare ya, hawi ya.



Saromao ati ehene me one yati waka
 nemetemoneke, Teoso taborobonaha.



Te waka namaki haro,
 tasa.

Owa nokobi hiri nematamonaka, Teoso taboro ka
 nokobibonehe.



Nokobi amosake haro.

Hiri ni hawa tohi
 ya mese
 oketehabanake,
 oro ya.

Me ka faha fowe seti
 nemetemoneke, Teoso
 taboro me ahi na mati.

Teboro hawa tohehimatamonaka, waha.
Hawa tohe ya Teoso ka yama hani wiye
me towakamehemetemoneke, Teoso
taboro toro ya. Teoso ka yama hani wiye
fofoya tohehemetemoneke, waha, Teoso
taboro boti ya.



Teoso taboro hawa tohe ya Saromao
Teoso ha nematamonaka.


Teoso titamina tike, ota ni
ya. Tiwa ota ha tehaba
otake ahi, titaboro ya.
Tinarabo hawiyahi.



Teoso taboro hawa tohe ya Saromao taboro hiri
nawahematamonaka, waha.

Saromao e
taboro amosaba
amake.

Ee, Ihayeo
me ka
towisawa
taboro e te
amaka.



Bara yama me tata tohehemetemoneke, Saromao ka
yamabonehe. Bani me toha, oro toha, yama nafi me ta
hinaharo.

Bani me tiwa
ha, me amosa
mati. Hika me
tabori tohari?

Afirika ka
bani me
amake.



Saromao ati ehene Ihayeo yamata
me tata tohehemetemoneke,
Saromao ni ya, hinaka kafaro me
tafebonehe.

Saromao ka
kafaro me
tafebone amake
haro.



Saromao ka kafaro me tama me awineke. Saromao ka kafaro me ihi e tefe watamarahaba e amake.



Yama we one ya Saromao nanarifa warabo nima nematamonaka.

Ee, tiwati amosake.

Me oyosehabana oke, nafiyo me hiri naba mati, yama kakanikabana, tabora bara ya, ma kowani karo, e kakariwahabana, kowani ya.



Me ati tamine omita oro tamahamoneke, tabora bara karo.



Saromao ka nafiyo yama nafi nima kobo ni nematamonaka, yama kanikebonaha. Saromao tamine me mitehemetemoneke, me nafi. Saba ka towisawa fana Saromao tamine mitaha Saromao yaka nabone ati nemetemoneke.



Saromao tamine omite tamine yama kihi nofe amaka, yama watohari. Keye amarini? Yaka onehibona onahareka, owehibonaha.



Saba ka towisawa fana
tokehemetemoneke, Serosare
ya, Saromao awahabonehe.


Ai. Serosare amosatehani
amake.



Tokiyomehemetemoneke, Saromao ka yobe toro ya.



Saromao hinaka yama yofi kanehimatamonaka, towisawa fana hiwahabonehe. Hinaka yobe yofi kana, Teoso taboro yofi kana, kafaro me tabori yofi kana, nematamonaka.





Yama bari kani me hiri nineke, owati ihi.

Eheboteba amake.



Serobowao amaka hari, wahari. Ati ehene yama me ahi nineke.



Saromao bara me fanawiri yayaba tohehimatamonaka. Bara me ka teoso me me nonofa tohehemetemoneke, Saromao fatirawaha.


Saromao fati ati ihi teoso taborobona me hiri nineke, bara me ka teoso.



Hiyakere owa ni ya. Era yokohiba amaka, Teoso hinofarahari.

Towisawa fana oro ta nemetemoneke, Saromao ni ya. Saromao yama ta nabisematamonaka, oro manakone, bisa. Towisawa fana Saromao ka yama nafi ki ni ya tokomemetemoneke.

Yama we one ya Serobowao yaka
nematamonaka, Serosarei yabori ya.
Teoso ati kakamina kobo
nematamonaka.



Serobowao tikariwahi ya
tiwa haha onahabana oke.
Teoso ati okominahabone oke,
tiwa ni ya.

Ayasi afa
tiwa ama?

Ayasi himataba makari sibi tine
tiri, tika makari?

Teoso ati ehene lhayeo me ebe
kanahaba me amake, afa me
nibama makari nineke.





Teoso ati e nareka ahi. Saromao ahabe nowati ya biti towisawa tohehiba amaka. Ihayeo me nafi ka towisawa tohareba amaka. Sota me ka towisawa tohehiba amaka. Ihayeo me one ka towisawa tihahaba ama tike, ha tiwa Teoso ati ehene. Teoso Saromao ehene nofaremona ati nareka, bara me ka teoso me tabori hiri nari.

Saromao Serobowao kakomatamonaka, waha, Serobowao towisawa toharebona ati nari.



Serobowao te siba nahi, te nabowehibana.

Serobowao tokehimatamonaka, Esito ya, Saromao hinabowarebonaha. Esito ka towisawa aate nematamonaka, Serobowao.



Osawiyabone onahara oke ahi, Esito ya, mata. Saromao ahabe ya okomatasabana oke, Ihayeo ya.

Ee tiwa ota nofake.

Saromao me one Serobowao siba nemetemoneke. Me hiwasirematamonaka.



Saromao bara me ka teoso mera
nofawehimatamonaka, fatirawa ya
tabarawahari.

Saromao
ota ka teoso
e ha naba
eke.

Yama we one
ya e ka Teoso
ha onahabana
oke, bisa.



Ihayeo me nafi bara me ka teoso me me
nofawehemetemoneke, waha.




Saromao
ahabematamonaka, bote
tohahari. Ihayeo me nafi
yoro
tokowamehemetemoneke,
Sekehe ya. Hobowao me
ha nemetemoneke,
towisawabonaha.
Saromao biti inomatamona
amaka, Hobowao.

Me ka owa tokehimatamonaka, Esito ya,
Saromao namoni.

Serobowao Saromao
ahabakamona. Hobowao me
ha namoneke,
towisawabonaha. Me nafi yoro
tokowamamoneke, Sekehe ya.

Okomabana
oke, Sekehe
ya.






Serobowao Hobowao narabo nima nematamonaka.

Hobowao lhayeo me ati e narake ahi. Abi ati ehene yamata me tata tohineke, kafaro me tafebonehe. Yamata me ta namarabone me ati narake, me fimirabone mati.


E hiyaratasahaba eke, tikamatasi ya, yiya terei na ahabi ya.

Hobowao tataba mera aate nematamonaka. Himata nima oribe? ati nematamonaka.



Hobowao tiwati e nabone tike ahi. Te ati onofa okere. Okobi ni ya yamata te ta na tamaramaro amake. Yamata nafi te ta naba teke, owa ni ya, ha owa, waha, tinahabone tike Serobowao ni ya.

Yiya terei na ahabi ya Hobowao mera hiyaratasematamonaka.




Te ati onofa okere. Okobi ni ya yamata te ta na tamaramaroke. Yamata nafi te ta naba teke, owa ni ya, ha owa, waha.



Hobowao e ka towisawa toharebanaka. Hima e tokomahi, fara e taboro ya. Hine ya Sota me ka towisawa tohehiba amaka, Hobowao.

Ihayeo Serobowao me ha nemetemoneke, me ka towisawabonaha. Hobowao tokomematamonaka, Serosarei ya, mera nakomehari.



Hobowao kobo toname saotato mera yoro tokaniwamematamonaka, me me mowa nabone mati, Ihayeo ka mati.

Hobowao saotato tiwa me noki narake, tiwati me mitahabone mati.

Ee, me okahabanabone oke.

Hibare mata.

Teoso ati e nareka ahi. Ihayeo me te mowa rabone Teoso ati nareka. Te ka one me te nahabirabone teke. Me ka towisawa Hobowao tohareba amaka, Teoso ati nareka.



Hike amara?

Semeya amaka, Teoso ati kakamina.



Teoso ati nima Hobowao nematamonaka. Sota ka saotato mera toyosemematamonaka, me me mowa rabone mati, fara me one, Ihayeo mati. Yama wehe one ya Serobowao nanarifa he aate nematamonaka.

Serobowao e ka one me tokomaki nofa me amake Serosarei ya teboro ya, Teoso taboro watare karo ahi.




Me tokomaki onofa okere Serosarei ya.

Himata ebe tinahaba ama tiri?

Teboro owa hiri onahabana oke ahi, me tokomakeriba karo Serosarei ya.



Ihayeo me ka towisawa inomatamona amaka, Serobowao. Yota me ka towisawa inomatamona amaka, Hobowao.



Ihayeo me toki Serobowao nofarematamonaka Serosarei ya. Sota ka sitatimetemone amake, Serosarei. Teboro wehimatamonaka Serosarei ya. Serobowao bowi kanamori hiri nematamonaka, oro tohaharo, me ka teosobonaha, me tokomakiribone karo Seosarei ka teboro ya. Me tokomaki Serobowao hinofarehemetemoneke Serosarei ya. Me tokomaki ya Hobowao me nofawabone Serobowao ati boti ati nematamonaka.



E ka teosobona amaka hari. Efe amaka hari, Mowisei hekamehimata, Esito ya. Te tokomawaharaba teke Serosarei ya teboro ya.



Yama we one ya Serobowao biti kiya nematamonaka.

Serobowao inamatewe kiya nareka. Ahabeba amaka.

Teoso ati kakamina aate onahabone onahara oke.

Aya aate onahabana oke. Yama watote amaka. Aya taboro ya tikamakehi, aate tibaya.



Aya noko aawama toharematamonaka, bote tohari. Serobowao fati makari akawemetemoneke, hinaka makari amararo, me hiwatorahabonehe.

Tikiyomakehi. Serobowao fati ama tike. Tiwa owato oke. Tiwatari ya Teoso tiwa kaminareka owa ni ya. Teoso ati e nareka ahi. Tikami ya tikatao ahabeba amaka. Serobowao ehene hiyarareka, bowi kanamori hiri nari. Serobowao towisawa tohamarehibanaka owati ihi. Serobowao biti me nafi ahababanake owati ihi. Ihayeo me ihi hiyararake owa ni ya, teoso me one me me ha na mati. Bara me Ihayeo me me mono naba me amake. Ihayeo me me mono ni ya Ihayeo me okasomaraba me amake. Bara me Ihayeo me me towakamaba me amake, tabora bara ya, hiyo Efarati kowani ya yama yabo ya owati ihi, Teoso ati nareka.



Serobowao fati tokomi ya Serobowao biti ahabematamonaka. Serobowao ahaba, biti me ahaba, nemetemoneke. Towisawa owa tohawahimatamonaka. Inomatamona amaka Akabi, Serobowao biti amarari. Akabi ka sitati inimetemone amake Samariya.

Yama we one ya bara me kakehemetemoneke Samariya ya.




Hike me amari ha?

Tiro ka me amake. Sawi namoneke Akabi fatibonehe. Tiro ka towisawa bitemoneke, Akabi fatibonehe. Inimoneke Sesabeo.



Akabi yobe hiri
nematamonaka Bahao ka
yobebonaha. Tiro me ka
teoso inomatamona amaka
Bahao.

Sesabeo yobe
hawa tohahareka,
Bahao
taborobonaha.



E nafi Bahao ha nawahaba eke.
Bahao lhayeo me ka teoso
tohawehibanaka waha.



Teoso ati kakamina
Bahao me nofara
me awineke.


Me okahabanabana
oni, me me
hinahabihaba mati.





Sesabeo me hikahabanemetemoneke, Teoso ati kakamina mati. Yama we one ya Teoso ati kakamina owa kobo nakehimatamonaka, Akabi taboro ya.

Eriya amaka.



Akabi tiwehene hiyara tiwa awine tike, Bahao tinofa tiwa. Teoso ati ehene faha kakemateraboneke. Teoso ati ehene faha kakematasatehaba amake, yama toyabo ya.



Eriya tokomematamonaka.

Hike amaraya?

Hike amakara. Eriya amaka, Teoso ati kakamina.



Te siba naho, te nahabihibana.



Eriya keye hiri naka. Faha kakehaba amake Bahao ati ehene.

E awakere.



Faha kakemarehemetemoneke.

Faha watamakere. Teoso ati ehene tohe awaka, Eriya ati hikaminahari.

Eriya e ra? Me oyosehara oke,
Eriya me nahabihabone mati.

Eriya fawa
nareka.



Eriya wahiyematamonaka, faha bite witi ya,
ohariari. Teoso ati ehene Eriya tefebona bani
me hekamakimatamonaka.

Faha saihemetemoneke, faha kakemari karo.



Teoso faha yofi
tikanahi, ofahabana.
Bakasi owa oke.
Faha ofari ya
ohabariyahi.



Teoso ati ehene Eriya
tokehimatamonaka bara me tabori
ya, bara fana aate nebonaha.

Oko fahaba owa
tekawahi. Oko baoba
toha naho.


Faha
onakama-
matibeya,
tifahabana.



Ota tefe ahabakibone. Ota tefe ahabi
ya ota ahababa ota amake.



Te ahabaraba te awineke. Teoso ati
ehene te tefe ahabaraba te amake.
Oko baoba
hiri tinahi,
okobebana.



Eriya sasawi
tohehimatamonaka bara
fana tabori ya.

Ami Eriya ati fiya
torahareka. Tiriko e yabaha
tiriko ahabihina nofara amake.



Yama we one ya bara biti
kiya nematamonaka.

Tikatao himata
ebe nara?

Okatao hibati ya
kiya nofe amaka.
Hasi ni fawa nareka
hibayata ya. Ahabe
awaka.




Tiwati ihi toha
awineke.

Owakamehibanaka,
fara amo onofi ya.





Teoso tinakitamaho.



Kitamematamonaka. Tikatao tiwa ha. Kitamareka.

Eriya Teoso ati kakamina fare tiha tiwa awine tike.

Ihayeo me tabori ka faha watamarehemetemoneke. Akabi Obatiya ha nematamonaka, masiri amosa me siba nabone mati, me ka bani me tafebonehe. Akabi nanarifamatamona amaka, Obatiya, Teoso ati nonofa tohari, Bahao ati nofarari.



Obatiya e ka bani me ahabakibone, faha watari karo. Tikahi, masiri siba tibeya. Okabisiba ahi.




Obatiya toke Eriya kobo nematamonaka.

Eriya afa ama ti?


Afa ama oke.

Akabi Eriya tamine mite tokomakehimatamonaka, kobo hinehibonaha.



Eriya afa ama ti? Tiwati ihi faha kakemarineke. Tiwehene hiyakere.

Akabi tiwehene ta hiyakere, ha tiwa. Teoso ati ehene faha kakemarineke, Bahao tinofi karo.



Ihayeo me nafi ha tinahabana tike. Bahao ati kakamina me nafi ha tinahabana tike. E nafi abe kobo naba eke Kameo mese ya yati mese ya.

Akabi mera ha nematamonaka, me nafi.

Owati te kamitahi. Bahao Teoso yokana tohe ya te nofayaho. Bahao Teoso yokana tohare ya te nofarebanaka.



Bahao ati kakamina bowi me ibariaboneke tana mese ya. Bahao me aate hinehibonaka, yifo afo kanehibonaha. Teoso yokana tohe ya yifo afo kanehibonaka. Teoso yokana tohare ya yifo afo karehibonaka.



Eriya ati amosaka.

Hine totomi hike.



Bahao ati kakamina me ayakemetemoneke. Me kakakamawahama, nemetemoneke, Bahao me ha na mati.




Bahi nokorise ya Eriya ati yana nematamonaka, mera haha kanahari.

Te ayaki kitahi. Bahao toke awaka tabora bara ya. Bahao amo ne awaka.



Bahi toke ya me hasi nemetemoneke, me ma toha mati. Bahao yifo afo karehimatamonaka.



Eriya tana hiri nematamonaka.



Yifo so nirihimatamonaka tana mese ya. Bani ibarimatamonaka tana ya. Ati ehene tana me sika karehemetemoneke.



Te afi tonihahi. Afaafa naboneke.

Eriya Teoso ha nematamonaka.



Teoso owati timitahi. Me nafi tiwa watohi, Teoso yokana tiha tiwa.

Yama nafi hatihemetemoneke Teoso
ati ehene. Bani toha, yifo toha, tana
toha, nemetemoneke, hatiharo.

Eriya keye
hiri re awaka. Teoso
yokana ehene tohe
awaka.



Eriya ati ehene Bahao ati kakamina me me watehemetemoneke.

Keye me hiri na me awineke. Bahao Teoso yokana tohare awaka

Hima me e nahabihi.



Akabi sonehimatamonaka, Teoso nakomehari.



Akabi tiwamisamahi. Titafahi. Faha kakekibone.



Eriya itehimatamonaka, iso yobati tama kanahari, Teoso ha nari. Ati ehene he nanarifa warehimatamonaka yati mese ya, yama kakatomahari yama yabo ya. Faha tabiyo yama kakatomehimatamonaka ma neme ya yama yabo ya. Faha awarematamonaka.

Wete tonami seti nematamonaka Eriya ati ehene. Faya yama awehimatamonaka waha.



Wete tinamahi, yama tiwamibeya tasa.



Owaharake, neme sabi bite yama yabo karo.

Tikamahi Akabi ni ya. Tiyosemaho. Hawi hiyaraba amake faha ihi.

Tikamahi Akabi ni ya. Tiyosemaho. Hawi hiyaraba amake faha ihi.



Me nafi yayai nemetemoneke, faha kakeha ihi.

Faha kakeharake waha.

Teoso ati ehene tohe awaka.




Sesabeo yawehemetemoneke.

Sesabeo Eriya ati ehene Bahao ati kakamina me me nahabiharake.

Eriya onofa okere.

Tikamakehi, Eriya aate tibeya. Tiwati e nabone tike ahi. Eriya tihabaminabone tike Sesabeo ati ihi.





Eriya Sesabeo ati
tamine mite
tokehimatamonaka, he
nandarifa famahari.

Hibaka e
towakaribe?

E towakaba eke,
sitati Beseba ya.

Beseba ya Eriya nanarifa
tosekosehimatamonaka. Eriya
ohari tokehimatamonaka tabora
watari ya. Toke ma towiti
itarisematamonaka awa bite
bofe ya.

Teoso owa
tinabowahi.
Ohababana oke,
osawimaraba owa.



Eriya amo nematamonaka. Amo ne hinamati hinatafihimatamonaka, tefebona hekakehari. Teoso nanarifa tohehimatamonaka, hinamati.




Eriya titafihi.
Titafibeya.

Eriya tafehimatamonaka, tokatasehibanoho.

Eriya amo ni tamehimatamonaka, yaka nawaharehari. Hinaka yama wehe 40 tohehemetemoneke, yaka nari. Kobo nematamonaka yati ehebote ya. Yati inimetemoneke amake Sinai.



Teoso aate
onahabana oke
Sinai mese ya.



Tokomisehimatamonaka Sinai mese ya. Foyehimatamonaka yati hoti ya. Foye boni awehimatamonaka, boni kitaharo, yati baka kaniharo. Boni fawa tose nowati ya wami kima tonehemetemoneke. Wami kima tona nowati ya Eriya yifo hiri ni awehimatamonaka, hiri ni nafiharo.

Yama hiri ni fawa tosi ya Teoso Eriya basa kanehimatamonaka.



Eriya himata ebe tirini?

Teoso lhayeo tiwa me nofamakere, me nafi, teoso me one me me nofa mati. Owa me nahabiabone me ati narake, tiwa onofi karo. Tiwa onofa oke, owahariha owa.



Teoso ati yana nematamonaka. lhayeo me nake, owa me nofa mati. Me na me awineke, 7000 me toha mati, owa me nofaha mati. Wete tinamabana tike, owati tikaminamibeya. Tihabarabana tike me ati ihi.




Ee, okomabana oke.

Eriya wete tonamematamonaka lhayeo me tabori ya. Teoso ati ehene Ariseo siba nematamonaka, he ya famehibonaha. Ariseo kobo ne makari neme sota tone Ariseo weyeye nihimatamonaka.

Eriya owa hima tine ti?

Ee, tiwa hima one oke. Tiwa okanawanabone onahara oke, Teoso ati tikaminahabone tiwa, ohaba onowati ya. Owa nima tinahabone tike, Teoso ati ehene.



Owa noki tinahi mata. Okobi ya okomi me famaha me narabi nima oni ya e famahaba eke.

Ee, me aate tinahi.





Ariseo ya Eriya me fama me towakemetemoneke. Yama we one ya Akabi Naboti aate nematamonaka.





Titaboro okanika oke.

Akabi kame foremematamonaka fara hinaka kama ya.
Tafi nofarematamonaka, yawahari.



Akabi himata ebe tinahani tiwati watarineri?

Naboti taboro okanike taboro ta ni nofarareka.



Towisawa ama tira tiwa awine ti?


Owati ihi Naboti taboro tihawahabana tike.

Sesabeo yama hani rawi nemetemoneke, Akabi ka yama hanimonehe.



Yama hani ta tinahabone tike, Naboti me ka hiti me ni ya.

Sesabeo yama hani ta nemetemoneke, me ka yama hanibonehe, Naboti me ka hiti mati. Akabi ino rawi kanehemetemoneke yama hani ya.



Sesabeo ati e narake ahi. Naboti te nabowiyahi. Te ati ehene keye me hiri naba me amake. Me ati e naba me amake ahi. Naboti yama hiyara hiri nareka. Naboti Teoso kakowareka. E ka towisawa kako, nareka, me ati naba me amake, keye me hiri na mati.

Sesabeo himata ebe naba Naboti nabowi ino hiri nineri? Naboti yama hiyara hiri tere amaka. Naboti amosate amaka.

E awakere.



Naboti e naboware ya Sesabeo era kakowaba e amake. Ati ihi e ahababa e amake, Naboti e naboware ya.


Ee. Naboti e nabowaba eke. E ahabariyahi.



Naboti me ha hine kakehimatamonaka me ni ya.

Naboti Teoso kako, Akabi kako, nareka.

Keye amakere. Naboti ati omitara oke.



Naboti yama hiyara hiri ne amaka. Te kinariho, ahababaya.

Keye me hiri nineke. Yama hiyara hiri okere. Teoso okakorihi, e ka towisawa okakorihi, one oke.

Akabi tokometamonaka, Naboti taboro awehibonaha.

Naboti ahabematamonaka, me hinabowahari. Sesabeo Naboti tamine mitaha Naboti tamine hikaminehimatamonaka, Akabi ni ya, Naboti ahabari waha.

Akabi Naboti ahabemonaka. Naboti taboro tihawahabana tike waha.

Yayai oke. Naboti ahabeno taboro ohawahabana oke.



Ai, amosake haro.

Otaborobone amake waha.



Eriya kakehimatamonaka.

Eriya owa tiwasine ti?

Teoso ati e nareka ahi. Akabi tiwehene hiyaramone tike, Naboti taboro tihawa tiwa. Owati ihi tihababana tike. Sesabeo ahaba, nabanake. Tikatao me ahaba, nabanake me nafi. Te abohi yome me kabahabanake.



Yama we one ya Akabi Sosafa ha nematamonaka. Sota me ka towisawa inomatamona amaka, Sosafa.

Sosafa me ota mono nabone otake, Siriya ka mati. Hima e tabahaba eke. Me e mono nibeya.

Hima osawiabana oke. Ota ka saotato me hima onahabana oke.



Me yoro tokanemetemoneke, Siriya ka me me mowa nabone mati. Akabi wathimatamonaka, ahabi nofarari.

Makari one okawahabana oke, owa me watoraba owa.



Akabi saotato me ka makari akehimatamonaka.

Owa me watoraba me amake. Ohabarahaba ama oke.




Siriya ka me Akabi me watoremetemoneke. Saotato owamona me ati nemetemoneke. Siriya ka saotato owa sa hikanematamonaka, saotato owa ama nikani hinahari.



Ihayeo me hiwehimatamonaka, abohi.

Akabi ahabakeno. E tokomahi.



Kaho toro ama tohehimatamonaka, Akabi emene ehene. Kaho toro me soko nemetemoneke faha ya.

Yome te awa ha, Akabi emene hero nari, fare Eriya ati nima nari.

Sesabeo ahababisaba amake.



Akabi ahabe nowati ya Akabi biti towisawa totoha tohehimatamonaka waha. Yama we one ya Eriya Ariseo narabo nima nematamonaka.

Ariseo okahabone oke Beteo ya Teoso ati ehene. Tiwitabana tike.

E famahaba eke.



Teoso Eriya kakamebona ati nematamonaka. Eriya tamine kaminematamonaka Ariseo me ni ya. Sotao witi ya me kobo tokowite Eriya faha bori kanehimatamonaka makari ya. Faha ehebote inimetemone amake, Sotao. Eriya faha bori kane faha tokomikimehemetemoneke. Faha kori ya me kakariwahemetemoneke.



Faha kowani ya me kakariwaha me ma tokowite me yoro nemetemoneke.



Ariseo okomabana oke. Himata tinofariya, ta onahabana tiwa ni ya?

Eriya yama tiwato tike kasiro ya. Yama nafi owatowahabone onahara oke.



Oko tokomi tiwi ya yama tiwatowabana tike, yama nafi.



Kaho yama hiri ni tohe
kisehimatamonaka, Eriya
towakamehibanoho neme
ya.

Eriya tiwa owa oke. Yama
nafi owatowahaba ama
oke Teoso ati ehene.



Ariseo
tokomematamonaka, Eriya
ka makari akahari. Ariseo
faha boyo nematamonaka
tasa, makari ya,
tokariwahamehibonaha
faha kori ya.

Yama owato oke
waha.



Ariseo mera kobo nematamonaka, Eriya me one. Ariseo kariwame me hiwehimatamonaka, kamahari, kitahari, Eriya nima.

Eriya e siba naba eke, e kamohibana.

Te sibarama naho. Teoso hekamahareka.



Eriya me siba nemetemoneke yiya terei ni ya. Me hiwasirehimatamonaka.

Sesabeo tamine himitematamonaka, ahabemonaha.

Bese Eriya ahabakamona. Yayai oke.



Yama we one ya me ka owa me ka one
hiyarematamonaka. Eriya me ka owa
fatimetemone amake. Maki ahabematamonaka.



Tika yibote ahabareka,
oko yama manakone
nawatarahari. Oko yama
manakone tinahabihabana tike.
Yama manakone tinahabiri ya
tikatao me owakamahabana
oke.



Oko yinero
watakara.

Yama wamini ya
tikatao me
owakamaminahabana
oke.

Ariseo siba na Ariseo
wasihemetemoneke.

Ariseo.

Himata
amari?



Ariseo e ka owa
okatao mera
towakamehibona ati
nareka, yama
manakone
onawatara owa. Oko
yinero watakara.

Tiwa
okasomahabone
oke.





Himata yama tikihari, titaboro karo?

Oko boti ohari nofa ama oke, orifa fehe wiye.

Boti tikanikahabana tike, me ka boti, orifa fehe sika niba karo.



Boti kanikemetemoneke, boti tamaharo.

Ami boti tamake. Himata ya mo tinihaba amari?

Orifa fehe tiwa ha. Sika onaha ahabihina rarake.

Boti watakere.
Boti nafi mo ke.
Teoso ati ehene
tohe awaka.



Ariseo aate nemetemoneke.

Ariseo boti nafi mo
narake.

Orifa fehe ta tinahi, orifa
manakone tika yinerobona me
ta nibone karo. Mankobisa
yinero ta tinahabone tike, tika
yama manakone
tinahabihabone
tiwa.



Orifa fehe ta nemetemoneke. Yama waminatasi ya
kakeminehimatamonaka tasa.



Tikatao me e ri? Me
owakamahabone
oke.



Hiba, yinero
onakamamatiba.



Tika yineroba wara tikanahi.

Tika yinero wataremona tina yinero tikihani tiwa awine tike.



Ami tokomaka.

Ee, oko yama manakone ahabarake, Ariseo ehene.



Yama we one ya Siriya ka me kakehemetemoneke lhayeo ya. lhayeo me ka inamatewe me awehemetemoneke, ofeya nanarifa.

Hima e towakamahabanake, e ta nabana e taboro ya.

Owatabanake ha owa. Ofeya tiwatabana tike.

Nama taboro ya Nama fati nanarifa tohehemetemoneke. Siriya ka saotato mera yoyosematamona amaka, Nama.



Nama fati Ariseo tamine kaminemetemoneke, tamine maki himitebonaha. Nama towisawa aate nematamonaka, Siriya ka towisawa.

E awakere. Yama hani ta onahabanake, towisawa hiwahabana, Ihayeo ka towisawa. Yama hani tekamahabana tike.



Nama tokehimatamonaka, Ihayeo me tabori ya. Yama hani ta tokowitehimatamonaka towisawa ni ya.

Nama onakitamabone towisawa ati nareka yama hani ya. Nakitami owato okara, Teoso ama ori karo.



Otara me mowa nabone me ati nani me awineke.



Ariseo Nama tamine mitehimatamonaka, towisawa aate nari. Ariseo he nanarifa yosehimatamonaka, towisawa narabo nima nebonaha.


Ariseo ati e nareka ahi. Nama kakeyaho owa ni ya, ohiyarehibonaha, Teoso ati mitehibonaha, ati nareka.

Ee, Nama aate onahabana oke.



Nama tokehimatamonaka Ariseo taboro ya. Ariseo nanarifa aate hinehimatamonaka.

Afi tinahabone Ariseo ati nareka, tikitamahabone tiwa. Tika afi ni seti nabone tike Sotao ya.



Ariseo owa aate reba ama? Owa nakitamareba ama, fare? Ariseo ati onofa okere.



Nama tokomematamonaka, yawahari. He nanarifa narabo nima hinehimatamonaka.

Nama tokifiwahawiti afi nematamonaka, Sotao ya.

Nama afi tinahi, Sotao ya. Totomi tinahi.



Okitamaraba ama oke.



Nama afi nematamonaka. Afi ni seti nematamonaka.

Nama tika ataro amosake waha, inamatewe ataro nima.

Okitama oke.



Nama fari namehimatamonaka, Ariseo taboro ya.

Ariseo okitamahara oke. Teoso onofa oke waha, ohariyari, owa nakitamahari. Ota ka teoso Himo tohe onofama okere, Teoso yokana amare karo. Tika yamaba ta onahabana oke, owa tinakitami karo. Oro toha, barata toha, makari toha, nabanake.

Yama onofa okere.



Nama tokomematamonaka Siriya ya.



Ebe okitama oke.

Ee, inamatewe ati amosarake, Ariseo kaminaro.

Yama we one ya Siriya ka me me wati kanehemetemoneke, Ihayeo mati.



Ihayeo me ka towisawa te watahaba teke hawi ya.

Ihayeo me ka towisawa yana tone me ka owa aate hinehimatamonaka.



Tikamarahabone Ariseo ati nareka. Tikami ya Siriya ka tiwa me watahabone Ariseo ati nareka hawi ya.

Tokomarehimatamonaka, Siriya ka me hiwatarehibonaha. Siriya ka mera kakasawari tohehimatamonaka, me hiwatebonaha. Siriya ka towisawa ka saotato mera kakomatamonaka. "Hike owati kaminarano, Ihayeo me ka towisawa owati tamine mitehibonaha?" ati nematamonaka, yawahari.



Ota ati ehene amakere. Ariseo ati ehene tohe awaka, tiwati tamine kaminari Ihayeo ka towisawa ni ya.

Ariseo ati ehene ama? Te siba naho, te watabaya.




Yama we one ya Ariseo me wasihemetemoneke.

Ariseo sawihareka Tota ya.

Te tonakamaho, te watabaya.


Siriya ka saotato me nafi kakehemetemoneke, Ariseo me watahabone mati. Me amo nemetemoneke Tota witi ya. Yama we kamaki ya Ariseo nanarifa saotato mera awehimatamonaka.




Ariseo saotato me tamake, Siriya ka mati. Himata nima e naba e amari?

Me e nakomerima nahi. E ka saotato me tamake. Me ka saotato me tamakere.

Ariseo nanarifa saotato mera aawa toharematamonaka,
 Ariseo hinamobanoho. Ariseo ati ehene Teoso saotato mera
 namohimatamonaka, Ariseo nanarifa me hiwahabone mati.
 Kaho hiri ni awehimatamonaka neme kari, tamahari.



Siriya ka saotato me tokomakehemetemoneke,
 Ariseo me watahabone mati. Ariseo Teoso warabo
 nima nematamonaka. Siriya ka saotato me noki
 awamarehemetemoneke, Teoso ati ehene.



Ariseo saotato mera towakematamonaka Samariya ya. Ihayeo ka towisawa taboromatamona amaka, Samariya.



Teoso me noki tinamosamahi.

Me noki awamemetemoneke Teoso ati ehene.


Samariya amake.

E ahabawahaba e amake.



Ariseo me onahabihibana?

Me tinahabihariyahi. Me tinatafahi, me tokomaba mati fara me tabori ya.



Ihayeo ka towisawa mera mari nematamonaka.

E tefebone ta nareka. Era nahabireba awaka.



Siriya ka saotato me tokomemetemoneke. Yama we one ya Samariya ka me me mowa nabone me ati nemetemoneke.

Me e mowa nabanake, Samariya ka mati.

Nokobi me bari kana me awineke, e tokiyomaribone karo.



Siriya ka saotato me kobo nakehemetemoneke Samariya witi ya. Samariya ka nokobi me boko kanehemetemoneke, Siriya ka saotato me tokiyomaribone karo. Abariko tame ya me me nonoki tohehemetemoneke, me nahobasa mati sitati beheri ya. Samariya ka me tafe ahabemetemoneke, Siriya ka saotato me me noki hikana mati.

Fimi me hiwasi ya nokobi me se kanahaba me amake. Me tafe ahababa me awineke.




Towisawa me aate
nemetemoneke, me fimiha
mati, Samariya ka mati.

Sorao ota tefe
ahaba otake.

Himata nima e
nawahaba e amari?

E ahababa e amake
waha.





Ihayeo me kowato na me wiwina tohehemetemoneke, sitati beheri ya, me one me kayokorahabone mati, me atari kome me awa mati. Me tafe ahabemetemoneke.



Ofimi oke. Okomakehabana oke sitati ya, yamata okanikahaba owa.

Tokomakerima tinahi. Yama kabahaba watara awineke, sitati karo.

Hima e tokahaba eke Siriya ka saotato me tabori ya. Siriya ka era me nahabi ya era me nahabi naba eke. E tefeba me ta naba me awineke. E wini ya e ahababa e amake, e tefe watari karo.



Me tokehemetemoneke Siriya ka saotato me tabori ya.



Me e ri?

Me watara me awineke.

Me watakere. Yobe hinita tohaka.







Me tafaha me tafi ahabi ya yama me kakatometemoneke, Siriya ka me ka yama.

Oro one owasi oke.

Makari tiwa ha. Makari amosake.



Hima yama e kehemohi, me hiwarabana.

Makari weye tini ya makari tibotihamone me ati naba me amake.



Me e aate nabanake, e ka one mati, sitati ka mati. Yamata e kaminabone eke me ni ya. Me fimiha me awineke.

Me e aate ri ya era me kakoaba me amake.



Nokobi taotao nematamonaka, mera ha nari.

Siriya ka me nafi banaha me awineke.

Hibaka me tokoma me awineri?



E awakere. Yama owato okere. Yama me tonihakosanike, yama nafi. Makari toha, yamata toha, oro toha, narake.

Me tamine okominahabone oke, e ka towisawa ni ya.



Sorao nanarifa Sorao mowa nematamonaka, Sorao amo nari, Siriya ka me tamine mitehibonaha.

Era me wahiya me awineke. E tokomaki ya era me nahabihaba me amake.

Tika saotato me tiyosehi, me tabori me hiwamakibeya.

Saotato me ka yama me awehemetemoneke hawi ya.



Yama me were toshanike, me kana nawaha mati.

Himata me ebe na me kana rinihiya?

Ihayeo me tokomake nemetemoneke Siriya ka me nowati ya hawi ya. Siriya ka saotato me towasimakiemetemoneke itarinoho hawi beheri ya.

Aate onehibanaka.



Himata te ebe na te tokomarini yama soki enoki ya?

Yama moni ota mita otake. Kaho moni tohe awaka. Esito ka saotato me moni toha me awineke, ota ati na otake. Me kakake, otara me mowa nabone mati, ota ati na otake. Faya ota kana nawaha otake.





Me te awahani me awine, Esito ka saotato mati?

Esito ka me ota awararake. Me moni ta ota mitaharake. Faya ota kana nawaha otake.



Hike me moni amarimone, Siriya ka saotato me moni himitamone mati?

Teoso ati ehene toheno awaka. Esito ka me watararake.



Ariseo ati amosaka. Yamata tamaharake, Samariya ka yamata waha, Teoso ati ehene.



Samariya ka me nafi tokehemetemoneke Siriya ka me tabori ya, yamata me kanikabone mati.

Tiwati okasawariyara oke. Yamata tamaharake.

Teoso ati amosaka.

Yama we one ya Ariseo me ka owa aate nematamonaka.

Orifa fehe tekamahi. Tikami ya Seo aate tiyahi, saotato me tabori ya.

Saotato me tabori ya Seo ha nematamonaka.

Seo tikama mata.


Teoso ati e nareka ahi. Ihayeo me ka towisawa tihahabone tike. Me te nahabihabone Teoso ati nareka, Bahao nonofa mati.

Seo himata ebe nara hari?

Ati e nareka ahi. Towisawa ohahabone Teoso ati nemonaka.

Sorao ati hinofarehiba amaka.

Saotato me yayai
nemetemoneke, Seo tamine
me mita mati.




Sesabeo biti
onahabihabana
oke. E tabibana?

Hima e tabahi.

Sorao tohaka
Sesereo ya. E
tokomakehi.

Me tokomakehemetemoneke
Sesereo ya.

Kaho kakeka,
kana ni kitahari.
Seo ka kaho tohe
awaka.



Sorao ya Sota ka towisawa me famehemetemoneke. Me famaha Seo me kobo nemetemoneke.

Sorao kana kawahebona ati ne rewete kawahe Seo sa hikanematamonaka, bari.

Himata amari?

Sorao ami ya te famaha te hiyakere, Bahao te nofa te.



Sorao ahabareka.

Sesabeo onahabihamakibana oke.



Sesabeo Seo tamine mitehemetemoneke.

Sesabeo tikatao Seo nahabihimonaka.

Seo kamehibanaka ahi.



Sesabeo Seo awehemetemoneke, kamahari. Warehemetemoneke nokobi wanaha ya, neme ya.

Sesabeo warineke haro, neme karo.




Owa te nofi ya Sesabeo te koro nisahi.



He nanarifa me koro
hinisemetemoneke, ahababanihi.
Seo ati ehene Bahao kanamori me
waka kanehemetemoneke, tamahari,
fara sitati nima nari.

Bahao kanamori
te waka kanahi.



Bahao ka yobe te nahabi nahi.



Sesabeo bite inimetemone amake, Ataraya. Sota ka towisawa matimetemone amake, Ataraya. Winehemetemoneke Sota ya. Sota ka towisawa ahabematamonaka, Seo ati ehene.



Ataraya hinakanoti mera wati kanehemetemoneke.



Ataraya saotato ha nemetemoneke.



Ataraya ati tamine towisawa hinakasima mitehemetemoneke.

Ataraya rabika awineke. Towisawa biti me me nahabihabone ati namoneke, me nafi. Sowasi ahabarebona onahara oke. Tikehemoho. Yama soki ya e towakamehibanaka yobe owa ya.



Yama soki ya me hekamehimatamonaka.



Matehe waka ni onofa okere.

E ati ehene amakere. Ataraya ati ihi amake.



Era me awehene me amake.

Sowasi ohi ne ya era me watehene e amake.



Inamatewe me towakemetemoneke
teboro ya. Nokobi me teo
nemetemoneke. Sasetoti Soyata tohe
nokobi se kanehimatamonaka.


Sowasi ota kakia otake.
Tikehemohibonaka, me
hinabowarebonaha.

Te
kakiyomakihi.



Okehemohibanaka ahi, me
hiwasirehibana. Sasetoti
me tabori amake haro. Me
one kiyomaketera me
amake ahi.





Saotato Ataraya hiyarematamonaka.

Ataraya tikatao biti me ota nahabiha otake, me nafi.

Ee, amosake.

Towisawa ohawabana oke waha.

Sota ka towisawa Ataraya tohehemetemoneke. Hinaka faha fowe sei nemetemoneke, towisawa tohaharo. Sota ka me nonofa hiharemetemoneke. Sasetoti Sowasi me nanayana tohehemetemoneke teboro toro ya, Ataraya hiwatorahari.



Himata amari?

Bahao kanamori amaka. Teoso yokana amakara. Aki hinofate amaka. Tiyani ya towisawa tihi ya Bahao kanamori nafi tinahabihabana tike. Tiwati ihi Teoso ati me nofahabanake waha.

Teoso ati e ne awara yama hani kari?

Teoso ati e nareka ahi. Owati te nofahaba teke, ati nareka.

Yama we one ya sasetoti owa Soyata aate nematamonaka.


Himata yama ya Sowasi towisawa tohehiba amara?

Sowasi yetene tohaka. Towisawa tohehiba amaka. Saotato me ha tinahi.



Soyata Sowasi namohimatamonaka, saotato me hiwehibonaha.

Owati te kamitahi. Sowasi amaka hari, towisawa biti. Sota ka towisawa tohawakabona. Te tabibanake, Ataraya hinabowarebana.



Ataraya winehemetemoneke fara tabori ya.

Hibake me ha ni amari? Teboro toro ya me nahoha me awineke, me ha na mati.



Ataraya kana ni kiyomakehemetemoneke
teboro toro ya. Sowasino
awehemetemoneke, Soyata ya famahari.




Sowasi e ka
towisawa
tohawakabona.

Sota ka towisawa
tohawakabona.

E ka towisawa
tohawakabona.

Te ati hiyakere.
Towisawa ama
oke, ha owa.



Sowasi ati ehene Bahao ka teboro me waka nemetemoneke. Sowasi ati ehene Teoso ka teboro me namosamehemetemoneke. Soyata ahabe nowati ya Sowasi Teoso ati nonofaraba na tohehimatamonaka. Sakariya Soyata biti tohe Sowasi warabo nima nematamonaka.



Sowasi Teoso ati e nareka ahi. Me nafi Bahao nofake waha. Me tiyosehabana tike, Teoso ati me nofahaba mati. Teoso ati me nofari ya Teoso hamehibona ati nareka.


Sakariya tokomematamonaka. Sakariya tokome nowati ya Bahao nonofa me kamehemetemoneke, Sowasi warabo me nima nabone mati.

Sakariya ati hiyarareka owa ni ya.

Me tiyosehabana tike, Sakariya me nabowahaba mati.



Te ati amasake owa ni ya. Me te yosehaba teke, Sakariya me nabowahaba mati.



Sakariya ahabematamonaka, Sowasi ati ehene. Teoso hamehimatamonaka waha, me ihi nofarari.

Teoso ati ehene Siriya ka
me me mowa
nemetemoneke, Sota mati.
Me me moto
kanehemetemoneke,
Serosarei ka mati. Sowasi
taboromatamona amaka,
Serosarei. Sowasi ati
ehene Siriya ka towisawa
ka yamabone me ta
nemetemoneke, saotato me
tokomibone karo.

Yama tiwa ha.
Sowasi yama ta
nareka. Yama tinofi
ya saotato me
tiyosemahi, me
tokomaba mati.

Yama onofa oke.
Yama amosake
owa ni ya.



Towisawa ati ehene saotato me tokomemetemoneke fara me tabori ya. Siriya ka me tokoma me nowati ya Sowasi forehimatamonaka hinaka kama ya, Siriya ka me hikatomahari.



Sowasi kitame awa?

Ahabakara mata. Ahabakabote nebona onahareka.



E nabowabana?

Hiba, e nonoki kana kawaha-mataho.

Yama soki ya Sowasi me wati kanehemetemoneke.

Hima, amo ni e nabowabaya.




Sowasi ahabematamonaka, me hinabowahari. Ahabe nowati ya biti towisawa tohawematamonaka tasa. Faha fowe tatama tohehemetemoneke. Sowasi biti inomatamona amaka, Amasiya. Amasiya biti inomatamona amaka tasa, Osiya. Osiya biti inomatamona amaka tasa, Yotao. Yotao biti inomatamona amaka tasa, Akasi. Akasi biti inomatamona amaka tasa, Esekiya. Sota ka me ka towisawamatamona amaka, Esekiya.

Esekiya mera hiyarematamonaka.

E ka abi me Bahao me nonofa tohehemetemoneke. Teoso ati me nofari ka Teoso hamehimatamonaka. Manakobisa ha e Teoso ati e nofahaba eke, Teoso yahabona karo.



Esekiya ati ehene teboru me namosemetemoneke, Teoso me ha nabone mati teboru toro ya.




Yama we one ya Samariya ka me tamine me mitehemetemoneke.

Me tamine timitini? Samariya hatihamoneke, Asiriya ka me ihi. Samariya ka me me towakamoneke tabora bara ya, yama yabo ya.

Me kakehaba me amake ahi, era me mowa naba mati.

Samariya ahabi nowati ya lhayeo me tamamarehemetemoneke, me hasi na mati. Me tamaha Asiriya ka me me heketememoneke tabora bara ya.



Ihayeo me ka owa inomatamona amaka, Yona. Teoso ati kakaminamatamona amaka, Yona Yama we one ya Yona Teoso ha hinehimatamonaka, tokehibonaha Ninifi ya, Teoso ati kaminebonaha, Ninifi ka me ni ya. Asiriya me tabori inimetemone amake, Ninifi. Yona toki nofrematamonaka, Asiriya ka me nofarari. Ihayeo Asiriya ka me abe nonofa toharemetemoneke.


Teoso toki onofa okere Ninifi ya.



Yona tokifiwahamematamonaka ma ka fa kabine ya.

Hika nafiyo
tokehiba
amara?

Tokehiba amaka
Esibaya ya.



Me towakemetemoneke ma ya. Ma enoki ya yama yana tonehemetemoneke. Boni toha, faha kake, nemetemoneke.

E tabahaba eke. Oko yinero amaka hari, e tabibone karo.

Ninifi ya okomakerabone onahara oke. Ninifi ka me onofa okere. Okahabone onahara oke ha ya, tabora one ya, Esibaya ya, okomakeribone karo Ninifi ya.



E kabokaba e amake. Nafiyo bokehiba amaka, faha rike ihi.



Me ka teoso me me hari narawemetemoneke, me ka teoso me me hikasomahabone mati.

Yona e ra?
Yona ka teoso ha reba ama?



Me ka owa Yona siba ne Yona wasihimatamonaka, amo nenoho nafiyo toro ya.

Yona titafihi.
Tika teoso ha tibeya, era kasomebana.





Yama noki yawari fara tohasa nemetemoneke. Me abe hiyaremetemoneke.

E ka owa yama hiyara hiri neno awaka. Makoni era yokoka.

Yiwa ibe e yabahi, e ka owa ino e watohabone e, yama hiyara hiri neno ino.

Me ka owa me nafi ini rawi nematamonaka yiwa ibe ya. Yiwa ibe nafi yoro tokaniwamematamonaka makari ya.




Yona tiwini amake haro, yiwa ibe karo. Himata nima tiwehene rini, yama hiyara hiri tinahani tiwa?

Ihayeo me ka owa ama oke. Teoso ati ehene Ninifi ya okahabone toki onofarara oke.



Himata nima e ribe waha?

Owa te koro nifehi ma ya, te ahabarahaba te.



Yona koro nifi me
nofaremetemoneke,
ahabarehibonaha,
wami watari karo.

Hima e ori ni
kitahi. E kobo
tokowitibe hibati
ya.

E towakarahaba
e amake. E fawa
kanisaba e amake.
Faha rike kitake.

Yona me koro nifehemetemoneke waha, fare ati ya.






Yona ahabarehimatamonaka. Amo ni terei nematamonaka aba ehebote toro ya. Teoso ha nematamonaka, Teoso hikasomehibonaha. Aba sa hinamematamonaka baraya ya, Teoso ati ehene.



Yona tokehimatamonaka Ninifi ya waha.




Yona mera hiyarematamonaka, Ninifi ka mati.


Teoso ati e nareka
ahi. Yama hiyara te
hiri nofahamone
Teoso ati nareka, te
nafi. 40 yiya tohaha
ahabiya Teoso tera
nahabihiba amaka.



Towisawa Yona ati tamine mitehimatamonaka. Yawehimatamonaka.



Me nafi Teoso ha nemetemoneke.



Teoso me hinahabiharemetemoneke, Ninifi ka mati.
 Yona yawehimatamonaka, Teoso ehene awahari,
 Teoso mera nahabirari. Tokome
 itaririse matamonaka Ninifi witi ya. Yobe biti hiri
 nematamonaka, yama bafobonehe. Teoso ati
 ehene mato yanehemetemoneke, yobe biti bari ya
 kaforiabanihi.

Mato ahabemetemoneke.
 Yama hiwe kitehemetemoneke
 waha.



Mato onofa oke,
 oko yama bafotohaharo.




Ohababana oke.

Teoso himataba
 mato tinahabiharini?

Teoso ati yana nematamonaka. Ati e
 nematamonaka ahi. "Yona mato tinofa tiwa
 awine ti? Himata ebe tinaha Ninifi ka me
 tinofatera ama tiri? Me tamate me amake.
 Me onofate ama oke," Teoso ati
 nematamonaka.




Yona mera
 nofawehimatamonaka,
 Ninifi ka mati, Teoso ati
 ehene, Teoso mera nofe
 karo. Teoso e nafi nofate
 amaka.



Yama we one ya Asiriya ka me me mowa nemetemoneke, Sota mati. Esekiya me tamine me himitemetemoneke.


Serosarei me moto kanahaba me amake.



Esekiya ati ehene faha hoti me wi nemetemoneke, faha kisakibone karo sitati tori ya, me ka faha nahabonehe, Serosarei ka mati.

Asiriya ka me moto kani ya e ka faha ahabaraba amake.

E ka one yama bari kani me namosarake, Asiriya ka me kakeribone karo.



Esekiya mera yoro tokaniwamematamonaka.

Asiriya ka me te nakomerima nahi. Teoso era kakatomaka. E ahabaraba e awineke.



Asiriya me kakehemetemoneke, me tamaha mati. Me nahobasehemetemoneke, yama bari kani beheri ya, Serosarei ka me me hiyara mati.

Nokobi te naha kanakabote nahi, ota tokiyomibeya. Nokobi te naha kani ya tera ota nahabiraba otake. Tera ota towakaba otake tabora bara ya, yama yabo ya. Nokobi te naha kari ya tera ota nahabihaba otake.

Serosarei ka me kakomehemetemoneke waha, Asiriya ka me ihi.

Me kita me awineke.

Tabora one me sari te me amake, tabora tamaharo.



Esekiya Saya aate
nematamonaka.
Teoso ati
kakamina
inomatamona
amaka, Saya.



Teoso era kakatomehiba awaka.
Me kiyomakeraba me amake, Teoso
ati ehene.

Asiriya ka me
fawa
nemetemone
me amake.



Esekiya Asiriya ka
me fawa nanike, me
ota awara mati.

Yama bari kani kowani ka
yama te siba nahi.

Saotato me
tokomakehemetemoneke.



Me ati watakere.

Me watara me
awineke.



Yama me kakatomehemetemoneke,
me tabiyo.

Me kiya
nani me
amake.

Me ahaba me awineke, me
nafi.



Asiriya ka me tamine Serosarei ka me
mitaha me yayai nemetemoneke.

Fara Esekiya ati nima
me nineke.

Teoso era kakatome
awaka, onahara oke.


Yama toyabo ya Esekiya ahabematamonaka, bote tohahari. Esekiya ahabe nowati ya biti Manase tohe towisawa tohawehimatamonaka.




Bahao nonofa me Manase narabo me nima nemetemoneke. Manase yetene tohehimatamonaka mata.

Manase bara me nafi Bahao me nofate me amake. Bahao e nofatehaba e amake bisa, ota ati na otake.

Me ati Manase nofahimatamonaka. Bahao kanamori me towakiyomamehemetemoneke, Teoso ka teboro toro ya, Manase ati ehene.



Teoso Asiriya ka mera kahabanehimatamonaka, Yota me me mowa nabone mati. Asiriya ka Manase mano me wete kasehemetemoneke.



Manase me towakamehemetemoneke tabora bara ya, yama yabo ya. Tabora inimetemone amake, Babironiya.



Manase fofoya tohehimatamonaka kateya ya, Babironiya ya.




Kateya tori ya foye Serosarei wati nawahematamonaka. Teoso wati nawaha, nematamonaka. Teoso ha nematamonaka waha.



Teoso Manase
nofawehimatamonaka waha,
Manase Teoso ati nofawehibona ati
nari. Teoso ati ehene Asiriya ka
towisawa mera yosehimatamonaka,
Manase me totimabone mati.

Manase
tifoyamarabana tike
kateya tori ya.
Tikamabana tike
Serosarei ya.



Serosarei ka me yayai nemetemoneke,
Manase kame ehene.



Manase
amaka.

Manase
kamenoka.



Manase kobo name
mera
hiyarematamonaka.

Owehene hihya
toharamaro ama
oke. Teoso ati
onofabana oke
waha.

Manase ati ehene Bahao
kanamori me
totimakehemetemoneke
teboru toro ya. Yama
toyabo ya Manase
ahabematamonaka, bote
tohahari. Manase ahabe
nowati ya biti Amo tohe
towisawa
tohawehimatamonaka tasa.
Hinaka faha fowe
famehemetemoneke,
towisawa tohahari. Teoso
ati nofare me one
hinabowehimatamonaka.
Amo ahabe nowati ya biti
Yosiya tohe towisawa
tohawehimatamonaka.



Yosiya Teoso ati nonofa tohehimatamonaka. Yama
we one ya he nanarifa mera ha nematamonaka, me
narabi nima nebonaha.

Teoso ka teboru te
namosamahaba teke.

Teboro me namosamehemetemoneke. Yama we one ya sasetoti yama hani awehimatamonaka teboroto ya.



Hibareya. Hike ka yama hanini amari ha?

Yama hani me kakatomehemetemoneke.

Teoso ka yama hani amake. Teoso atino amaka.

Ee. Fawa kanehemete e wasineke.



Teoso ka yama hani me kakatomehemetemoneke.

Himata nima yama hani ati ri?

Yama hani amosake kasiro ya. Onamoabanake towisawa ni ya.



Towisawa yama hani nofehiba awaka.



Yosiya nanarifa yama hani kaminematamonaka
Yosiya ni ya.

Ata tamake. Teoso ati nima
e ra eke.

Teoso era nofareba awaka,
ati nima e rari.



Ota ini Yosiya hiri
nematamonaka, Teoso ati
kakaminametemonehe.

Teoso aate tinahabana tike,
ati e wathibana.





Teoso ati e nareka ahi. Sota me ihi hihya toharineke. Yosiya ehene ta aamosa tohaka. Yosiya onofi ka oyahabana oke Sota me ni ya. Yosiya bote tohe ya ahabe ya oyawatehaba ama oke waha. Sota me owakatomamaraba ama oke waha.

Yosiya mera yoro tokaniwamematamonaka, mera hiyarebonaha.

Yosiya ati ehene Bahao kanamori me waka kanehemetemoneke. Bahao kanamori me sari kanehemetemoneke.



Yama hiyara te hiri namaraba teke. Teoso ati te nofi ya Teoso yahatehiba amaka, te ni ya.





Teoso tahi e hiri naba eke, Mowisei mera kakamemata, Ihayeo ya, hibati ya.

Yama toyabo ya Yosiya bote ahabematamonaka. Yosiya ahabe nowati ya Teoso Sota me nofamarehemetemoneke tasa. Bahao me nofamatasehemetemoneke.
 Babironiya ka saotato me kakehemetemoneke, Sota me me wati kana mati. Sota ka towisawa inomatamona amaka, Setekiya. Yosiya bitimatamona amaka, Setekiya.



Babironiya ka me Serosarei me moto
kanehemetemoneke. Yama bari kani me
nahabihabone me ati nemetemoneke, me
tokiyomahabone mati. Faha fowe famaha
ahabi ya me tokiyomehemetemoneke.



Setekiya me tokomabone me ati nemetemoneke yama soki ya, me kiyomakeha me ihi.

Hima e tokomahi. Sotao ya e kariwahaba eke, era me watoraba e.

Ee hima. E tokomari ya era me nahabihaba me amake.



Setekiya me tokoma Babironiya ka me me hiwatemetemoneke. Setekiya noko me bosu tonihemetemoneke, noko awamarehibonaha. Me hekamehimatamonaka Babironiya ya, yama yabo ya.



Sota me nafi me towakamehemetemoneke Babironiya ya. Me tamara me hasi nemetemoneke Sota ya, me one me me hekama mati.

Teoso era nofamare awaka.

Ee. Yama hiyara e hiri nofa e amake.




Babironiya ka me tokiyomehemetemoneke tebororo toro ya.
Yama amosa me yabehemetemoneke, me
hekamahabonehe Babironiya ya.



Hima Serosarei e sari kanahi, nafi.



Yobe nafi me sari kanehemetemoneke,
Serosarei ka yobe.



Serosarei me wati
nawahemetemoneke,
Sota mati, me toka mati
Babironiya ya.


So taminematamona amaka hari.

So yama kikiha
tohehimatamonaka. Wiwina
tohehimatamonaka Osi ya.
Hinaka ofeya toharawa, hinaka
kamero toharawa, hinaka bowi
toharawa, hinaka asometo
toharawa, he nanarifa me toha,
nemetemoneke.

Biti me seti toha, bite terei toharawa,
nemetemoneke. Yama we one ya
me ka owa So aate nematamonaka.

So tika yama
tamake kasiro ya.

Ee, oko yama
tamineke, Teoso
ati ehene, Teoso
onofi karo.



Fari toname So tamine kaminematamonaka me one ni ya.

So amosareka, hinaka yama tamaharo.

Ee, Teoso ati nofe ka hinaka yamaba Teoso ta hine hike.



Yama we one ya So biti me abe mari nemetemoneke. So Teoso kahiyarehimatamonaka.

Oko bani me totamarake waha. Teoso owa nofe awaka.



Teoso So nonofa tohehimatamonaka. Teoso So kaminematamonaka Satanaisi ni ya, neme ya, Teoso taboro ya. Satanaisi ati yana nematamonaka. Teoso So ka yamabone ta tini ka So amosate amaka. So tiwa nofaka, hinaka yama tami karo. Hinaka yama tiyabamaki ya hiyamarehiba amaka, Satanaisi ati nematamonaka. So ka yama Teoso toyabamakimatamonaka waha, hiwehibonaha, ati himitebonaha.

Yama we one ya Seba ka me kakehemetemoneke, So ka bowi me botirawabani mati. Bowi nanarifa me me nahabihemetemoneke, Seba ka mati.

Yama we one ya bahi yebe kani ehene ofeya me ahabemetemoneke. Ofeya nanarifa me ahaba, nemetemoneke, bahi yebe kani ehene.



Yama we one ya So biti me ayaka me ni ya boni kamehemetemoneke, kitaharo, yobe nasohabanihi. Me ahabemetemoneke, yobe me hikina mati, me nafi, me ayaka mati.

So yawehimatamonaka waha. Hinaka makari sibi nematamonaka, yawahari. Tati kone sowe, nematamonaka, yawahari, biti me tabiyo.

Teoso oko yamabone ta nemari amaka. Teoso yama yabamakeka, oko yama. Teoso ehene amosate amaka.

Teoso So ati mitehi yayai nematamonaka. Satanaisi ati yana nematamonaka tasa, So tamine mitahari. "Teoso So yama kome awe ya So tiwa nofamarehiba amaka," Satanaisi ati nematamonaka. Faya Satanaisi ati ehene So yama kome awehimatamonaka, Teoso hiwehibonaha, ati himitebonaha tasa. So yawehimatamonaka, kiya ni nafihari. Teoso nofasa nematamonaka, yawahari.



So fati Teoso nofamarehemetemoneke.

So himata ebe tine tiri?

Oko nafi bosaro nara oke. Bosaro kome kitaharake kasiro ya.

So Teoso tikakohi, tihabibeya, Teoso ati ehene.





Yama we one ya So me
yaka nemetemoneke.

So titamine ota mita otake,
yama kome tiwahamone tiwa.

So ehene hiyareno
awaka. Ehene hiyare
ka Teoso hinofamare
awaka.



So yawe me awi ka me ati
wataremetemoneke.

Okomi owa
nawatari ya
owatarenemete
ama oke. Owatari
ya amosene amake.

So yama hiyara hiri tinahani
ama tike. Himata nima tiwehene
rini, yama hiyara hiri
tinahani tiwa?



Yama hiyara hiri orahara oke. Owehene amosara oke. Teoso owa nofasa ne awaka.

So keye hiri tine tike. Teoso tiwa nofamare awaka, tiwehene hiyari karo.

Owehene amosa owa awine oke.




So boni moni mitehimatamonaka, Teoso ati tohaharo.

Teoso ati tohe awaka.

So te one me ati hiyakere owa ni ya. Yama hiyara hiri tikere.

Teoso ama oke. Yama nafi hiri one oke.
Yama amosa hiri ote ama oke.



Faya Teoso hiwa kaminematamonaka
So ni ya, yama nafi hiri nari. Wami hiri, ma hiri,
neme hiri, amowa me hiri, yama nafi hiri, nemona
ati nematamonaka. "So yama nafi hiri titera ama
tike," Teoso ati nematamonaka.



Teoso tiwati amosake owa
ni ya. Tiwa wato yokana
ohatera ama oke. Tiwa owato
oke waha. Yama amosa hiri
tine tike, nafi.

Yama we one ya So kitamematamonaka,
Teoso ati ehene. Teoso yama ta
nematamonaka tasa, So ni ya.



Hinaka yama
totamamatasehemetemoneke
tasa. Biti mebone Teoso ta
hitasemetemoneke.

Seremiya taminematamona amaka hari.

Seremiya nafire ya bati ya tofamamehimatamonaka Serosarei ya. Sota ka towisawa awehimatamonaka, Yosiya tohahari. Efe Yosiyamatamona amaka, Amo biti tohahari.

Yosiya e ka towisawabona amaka.

Yosiya nafikara. Owa nima naka.




Seremiya nafiwehi Teoso ha hinehimatamonaka, Teoso ati kaminebonaha sota me ni ya.

Teoso owati wato yokana tohakere. Bote ama okere mata. Me onakomeha oke.




"Seremiya watorima tinahi. Tiwa owakatoma oke," Teoso ati nematamonaka. Seremiya Teoso ati kaminematamonaka me one ni ya.

Teoso owa ha ne ati okominehibona ati ne amaka te ni ya.



Seremiya Teoso ati kakamina tihibana? Me tinakomehara tiwa awine ti? Teoso ati me nofara me awineke. Bara me ka teoso me me nofa me awineke bisa.

Me onakomeha okere. Teoso owa kakatomehibona ati nareka.



Yama we one ya Seremiya yiwa boni awehimatamonaka, itari behe tonaharo nakani ya. Teoso Seremiya aate nematamonaka. "Seremiya himata tiwine tiri?"

Yama behe toneke nakani ya.



Teoso ati yana nematamonaka. "Bara me yoro tokanaba me amake nakani ya. Me kakehaba me amake ahi, sota me me mowa naba mati. Fara owati ihi me kakehaba me amake, sota owati me nofari karo," Teoso ati nematamonaka.

Seremiya Teoso ati kaminematamonaka sota me ni ya.



Hike amara? Habo bayi awaka.

E watehibanaka, hiyaramarebana.

Seremiya tokomematamonaka Yosiya ni ya, Serosarei ya.




Yosiya Teoso ati nofate amaka. Owa kasomeba amaka.

Seremiya Yosiya me famehemetemoneke Serosarei ya. Teoso ati kakamina tohehimatamonaka me ni ya, Serosarei ka mati. Yama we one ya Yosiya me me mowa nabone ati nematamonaka, Esito ka mati. Me ka owa Yosiya kaminematamonaka Seremiya ni ya.

Yosiya me tokomakehemetemoneke, esito me me mowa nabone mati.


Esito Sota me kakariwahabone me ati namoneke, Asiriya me me mowa nabone mati, Sota kowani ya. Yosiya me kariwahi me hinofarake. Yosiya saotato mera yoro tokanihareka, esito me me mowa nabone mati.

See. Yosiya me kitaraba me amake, esito me ihi. Esito me kitaha me awineke.



Yosiya me kitaremetemoneke, esito me ihi. Yosiya ahabematamonaka, esito me ihi. Yosiya biti towisawa tohawahimatamonaka tasa, Soyaki tohahari. Soyaki me aate nemetemoneke, Sota ka mati, bara me ka teoso me me nofaha mati.

Soyaki Teoso ati abi nofe ka ahabenoka. Teoso ati e nofamarahaba eke, e nafi. Bara me ka teoso me e nofawahaba eke. Bara me ka teoso me e nofi ya e kitahaba eke. Fara me kiti nima e kiti naba e amake.



Soyaki ni ya me ati amosemetemoneke. Bara me ka teoso me me nofawehemetemoneke waha, me nafi. Seremiya mera hora nematamonaka.

Seremiya tiwati watarima nahi. Teoso ati ota mitarabone otake.



Yama we one ya Seremiya me ka owa
awehimatamonaka, boti kero nari.



Himataba boti
tinahabihine tiri?

Hiyararake. Hiri
onamatasahaboneke.



Yama we one ya Seremiya mera hiyarematamonaka,
boti tama nari.

Fara boti nima te nineke. Boti hiyari
nima te ehene hiyari nineke, Teoso
ati te nofara te. Teoso tera
nofamarehiba amaka.



Boti koro owitia koro towiti
nima te naba te amake, Teoso
ehene. Fara boti waka ni nima
te ahabi naba te amake, bara
tera me mowa ni ya.



Seremiya mera hiyarematamonaka Teoso taboro ya, Teoso ati kaminari. Seremiya ati sasetoti me nofaremetemoneke.



Baso ati ehene Seremiya me watehemetemoneke.



Yama we one ya iso me soba hikanamehimatamonaka. Mano toha, nematamonaka. Me ka owa Seremiya aate nematamonaka.

Seremiya Baroki ama oke. E famawahaba eke.

E, e famawahaba eke.



Yama we one ya yama mowa ni tamine me mitehemetemoneke.

Babironiya ka esito me me mowa namoneke. Esito me kitaramoneke, Babironiya ka me ihi.

Babironiya ka me kakehaba me ama ahi?



Yama totoyabo ni ya Babironiya ka me kakehemetemoneke fahi waha, Sota ka me me mowa nabone mati. Sota ka me kitaremetemoneke, Babironiya ka me ihi.

Soyaki oro ta tinahabana tike ota ni ya. Te one me ota towakamahabone otake Babironiya ya. Tiwinabana tike, Sota ka towisawaba tiwa bisa.




Sota ka me one me me towakamehemetemoneke Babironiya ya. Me one towinakosemetemoneke.

Seremiya ati ehene Baroki yama hani rawi nematamonaka.

Baroki yama hani towakamehimatamonaka Teoso taboro ya. Yama hani ati yabehimatamonaka. Ati me hikamitehimatamonaka, yama hani kaminari.



Baroki owati rawi tinahi, Teoso ati okomina owa.



Yama hani e kaminaba eke, towisawa himitabana.

Towisawa Seremiya ka yama hani nofarematamonaka. Yama hani wisi nematamonaka yimawa ya. Wisi hina sari hikanemetemoneke.



Seremiya me te siba nahi, Baroki ya famahari. Me te te nibeya kateya ya.

Seremiya Baroki me fama me fawa kanehemetemoneke.



Baroki owati rawi tinamatasahi.

Yama we one ya Soyaki me one warabo nima hinehimatamonaka.

Soyaki oro e ta namaraba eke Babironiya ka me ni ya. Me kamatasi ya me e mowa nabanake. E kitahaba e awineke.

Ee, tiwati amosake owa ni ya. Me ka oroba ta onamarahabanake waha.



Seremiya Soyaki ati tamine mitehimatamonaka.



Soyaki me kitaraba me amake, Babironiya ka me ihi.

Seremiya me narabi nima nematamonaka.

Babironiya ka me kakehaba me amake ahi. Te kitaraba te amake, me ihi, Teoso ati nareka.

Yama totoyabo ni ya Soyaki ahabematamonaka. Biti towisawa tohawe himatamonaka tasa. Inomatamona amaka, Yowaki. Yowaki bati ehene nima ehene nematamonaka, Babironiya ka me ka oroba ta rari. Seremiya mera hiyarematamonaka.




Seremiya ati me nofaremetemoneke, Teoso ati kaminari. Yama we one ya Babironiya ka me kakehemetemoneke, fare ati ya.

Babironiya ka me kakineke haro.




Me abe mowa na Sota ka me kitaremetemoneke, Babironiya ka me ihi. Serosarei me nahabiremetemoneke mata.



Yowaki mowi nisehimatamonaka, Babironiya ka towisawa nokosi ya.

Yowaki tiwa ota towakamahaba otake Babironiya ya. Owati ihi abise towisawa tohawehibonaka, Setekiya tohahari.



Babironiya ka Sota ka me me towakamehemetemoneke, me tamaha mati, Babironiya ya. Teoso taboro ka oro Babironiya ka me towakamehemetemoneke.

Babironiya ka towisawa ati ehene Setekiya oro tata tohehimatamonaka, Babironiya ka me ni ya. Yama we one ya Setekiya me one he warabo me nima nemetemoneke.

Setekiya himataba oro ta tine tiri me ni ya?

Oro ta one oke, era me mowa rabone e.



Oro ta tinamarabone tike Babironiya ka me ni ya. Oro ta tinamari ya me kakehaba me amake ahi, era mowa naba mati. Me kaki ya Esito ka me ha tinahabone tike, era me kasomaba mati.

Ee, tiwati amosake owa ni ya.



Seremiya Setekiya ati tamine mite yaka nematamonaka sitati baikani ya, bowi ka awa tiwa nari.

Himata amari?

Bowi ka awa amake. Bowi namiti bari ya awa e nawani ya bowi hamatera amake. Bowi nima e naba eke, Teoso ati nareka. Babironiya ka me e mowa rabone eke, Teoso ati nareka.



Awa baka osabana oke. Babironiya me onakomeha okere.

Yama we one ya Esito ka me ka owa kakehimatamonaka, Setekiya aate nebonaha.

Setekiya e tabahabone eke, Babironiya me e mowa nabone e.

Ee, e tabahi.



Setekiya ati tamine Seremiya mitehimatamonaka,
Esito ka me ka owa hiyarari.

Setekiya e kitaraba e amake,
Babironiya ka me ihi. Serosarei
me nahabihaba me amake
waha.

E kitahaba e amake.



Babironiya ka me kakehemetemoneke
tasa, sota me me mowa nabone mati.
Serosarei me moto
kanehemetemoneke.

Esito me e ri?



Yama we one ya Babironiya ka me wete tonamemetemoneke.




Me tokomake.



Era me nakomeha me awineke.

Setekiya keye hiri re awaka.

Babironiya ka era me nakomekere. Esito ka me me mowa naba me amake. Me mowa ni ahabi ya me kamahaba me amake ahi.



Yama we one ya Seremiya yaka nebona ati nematamonaka, taboro ya.



Wawa tina fahi. Tikamarabone tike ahi. Babironiya ka me ya tabi tinofa tiwa awine tike.

Babironiya me ni ya okomarabone oke. Okomabone oke otaboro ya.


Seremiya me towakamehemetemoneke, Setekiya ni ya.

Saotato Seremiya me ibehemetemoneke kateya ya. Esito me mowa ni me hawa tohi ya Babironiya ka me kamehemetemoneke Serosarei ya.



Setekiya Teoso ati e nareka ahi. Babironiya ka me e mowa rabone eke. Me e mowa ni ya Serosarei me nahabihaba me amake.

Seremiya e nabowaba eke. Seremiya era nofare awaka.



Ee, te nabowaho.




Seremiya me ibehemetemoneke faha hoti wiye hinita ya.

Seremiya ahabeba amaka, fimi ihi.



Yama we one ya Setekiya nanarifa Seremiya itihimatamonaka.

Owa te itiri ya ohabene ama oke, fimi ihi.



Serosarei ka yamata ahabemetemoneke, Babironiya ka Serosarei me moto kani karo, me tokomara mati. Setekiya Seremiya ino hiri nematamonaka.

Babironiya ka me mowa ni ota fawa ni ya e ka one owa me nahabihaba ama oke.

Seremiya himata nima Teoso ati ra?

Babironiya ka me mowa ni te fawa ni ya Serosarei ahabarabone Teoso ati nareka.



Setekiya ati ehene Seremiya sasawi tohehimatamonaka saotato me tabori ya. Hinaka faha fowe famehemetemoneke, sawihari. Yama we one ya me ka owa Babironiya ka mera kaminematamonaka, Seremiya ni ya.

Seremiya Babironiya ka yama bari kani me nahotihamoneke.

Serosarei me nahabihaba me amake waha.



Babironiya ka Setekiya me watehemetemoneke. Setekiya noko me soba nemetemoneke. Me hekamehimatamonaka Babironiya ya.



Babironiya ka me ka saotato mera hahabana Seremiya wasihimatamonaka.

Seremiya tiwa otisabana oke. Babironiya ya toki tinofi ya tika, tinahi. Sota ya wini tinofi ya tiwina tinahi.


Owinabisabana oke Sota ya.



Babironiya ka Serosarei me sari kanehemetemoneke.



Yama bari kani me nahabihemetemoneke.



Tabora one ya me winaha me kamehemetemoneke Sota ya, Setaraya ati ehene. Me ka owa towisawa tohehibona ati ne Setaraya nabowehimatamonaka. Sota ka me Babironiya ka me me nakomehemetemoneke.




Seremiya keye hiri nemona me ati nemetemoneke. Me tokometemoneke Esito ya. Seremiya me towakamehemetemoneke. Me tamamarehemetemoneke, Sota ka mati.



Esekiyeo taminematamona amaka hari.

Babironiya ka Sota ka me me towakamehemetemoneke Babironiya ya, me tamaha mati, me winahabone mati. Esekiyeo sawi, nematamonaka.



Babironiya amake haro.

Esekiyeo taborobona siba nematamonaka, winabona karo.

Hika ota tohiribe?

Te winahaba teke Keba witi ya. Babironiya ka faha ehebote ini amake, Keba.



Esekiyeo fatara koro nematamonaka, tiriko koro nari.

Esekiyeo wami amosake haro. E fimiraba e amake.

Ee, e winahaba eke ahi waha.



Me one Esekiyeo kaminemetemoneke.

Esekiyeo tiwinihi? Winehiba tohahareka Babironiya ya.

Wini onofa okere ahi. Wete onamabana oke Sota ya.



Seremiya yama hani ta nematamonaka Babironiya ya, me hiwahabonehe, Sota ka mati, Babironiya ya me sawiha mati.

Babironiya ya e winahabone Seremiya ati nareka, hinaka yama hani ati nareka. E ka faha fowe 70 naboneke, e wini karo ahi Babironiya ya, ati nareka.

Esekiyeo Seremiya ati timitinihi, yama hani kari?

Seremiya Teoso ati kamine awaka.



Esekiyeo hinaka yobebona hiri nematamonaka.

Yobe ehebote hiri onahabana oke, Teoso ati kakaminabana.




Yama we one ya Esekiyeo noko
awehimatamonaka neme ya.



Himata yama amari
ha?

Bani mera awehimatamonaka, me kowato na
mati, neme ya. Bani me oye kitehemetemoneke,
bahi nima. Bani me bofe ya hota towakimisama
awehimatamonaka. Bani me neme ya e itari
kawari, nemetemoneke, ehebote.



Teoso ehene tohe
awaka.

Teoso Esekiyeo ha nematamonaka, ati hikaminehibonaha me one ni ya.

Serosarei tome amake haro. E ka one Teoso ati me nofamaraharake, bara me ka teoso me me nofa mati.


Yama te awa ha. Serosarei ahababa amake, Teoso ati ehene.

See. Serosarei hatihaba ama?

Esekiyeo keye hiri nemona me ati nemetemoneke. Yama we one ya Esekiyeo fati ahabemetemoneke. Yawehi ohi rematamonaka, fati ahabaro.



Yama we one ya me ka owa tasi nakehimatamonaka.





Himata Serosarei ebe na ahabarini?

Babironiya ka Serosarei me moto kana me ihi me tamaha me ahabaraké, fimi ihi, e ka one mati. Me one Babironiya ka me me hinahabiha, hinaharake. Yama bari kani me nahabiharake. Sitati me sari kanaharake.



E ka sitati amosate ahabineke.

Fara e ka one me ihi amake, bara me ka teoso me me nofaha mati.



Me ihi nima te ehene nineke.

E ehene amosi ya Teoso era nofawamehiba amaka. Teoso ati ehene e tokomaba eke tasa, Serosarei ya, Serosarei e hiri namahaba e.

Taniyeo taminematamona amaka hari. Babironiya ka Taniyeo me me towakamehemetemoneke Babironiya ya. Sataraki toha, Mesaki toha, Abeteneko toha, me nemetemoneke.

Taniyeo himata nima e nawahaba e amari?

E awakere. Teoso era kakatomaka.



Babironiya ka towisawa nanarifa mera hiyarematamonaka.

Towisawa nanarifa ati ehene yama hani me rawi nemetemoneke.

Towisawa tera ati nareka, te tabawahibonehe.

Yama hani rawi ni te amosi ya towisawa ni ya te sawihaba teke.



Oko yama hani amosa awine?

Amosa awineke.

Yama we one ya towisawa nanarifa mera ha nematamonaka.

Te ka yama hani amosarake. Yama hani one te rawi namakihaba teke. Te ka faha fowe terei naba teke, yama hani te rawi na te. Faha fowe terei na ahabi ya towisawa ya te tabawahaba teke waha.

Era nofe awaka.



Towisawa taboro ya me winawehemetemoneke. Towisawa yamata hikaba one ta nematamonaka, me hikababonehe.

Bani hahi ota kabarebonaka. Fi haha ota fawarihi, nabone otake. Fatara ka yamata ota kabahabone otake, faha ota fawaha ota.



Taniyeo te kitaraba te amake. Te kitari ya ohababa ama oke, towisawa ati ehene.



Fatara ka yamata ota totomi naba otake. Yiya tei na ahabi ya otara te awahaba teke. Ota kitari ya yamata one ota ihawahaba otake.



Yiya tei na ahaba nowati ya Taniyeo me kitehemetemoneke, kasiro ya.

Faha fowe terei na ahabi ya towisawa mera aate nematamonaka. Towisawa inomatamona amaka hari, Nabokotonoso.

Taniyeo yama me watoke. Me ya ota tabawahaba otake.

Me ati amosate me amake.



Yama soki one ya towisawa
watamimatamonaka. He ya
tataba yama me watoha mera ha
nematamonaka, watari
kaminebonaha.

Owatamiha oko wata
owatomarara oke. Oko
wata te kaminahi owa
ni ya,
owatowahabana.

Tika wata ota watokere.
Tika wata tiwatohi, fara
tiwa.



Tera onofamarabana oke.
Owati ihi te ahababa te amake,
te nafi, owa ya tataba me te.

Towisawa ati he nanarifa kaminematamonaka Taniyeo
me ni ya.

Taniyeo towisawa ati ehene te
ahababa te amake.

Himatabana?
Yama hiyara
ota hiri kere.



Taniyeo towisawa narabo nima nematamonaka.

Tikaminaminahabanake yama wamini ya.

Nabokotonoso tika wata okominahabone oke tiwa ni ya. Teoso aate oni ya tika wata Teoso kaminebanaka owa ni ya.

Taniyeo ya tataba mera aate nematamonaka.

Taniyeo himata ebe tinahaba ama tiri?

Teoso aate onahabone oke, towisawa watari kaminebonaha owa ni ya. Teoso e ha nahi.



Teoso me ha nemetemoneke. Yama soki ya Taniyeo watamimatamonaka, Teoso ati ehene. Towisawa watari nima watari nematamonaka tasa.

Efe amaka, towisawa watari.



Taniyeo tokomatasehimatamonaka, towisawa ni ya.

Taniyeo oko wata tikaminibana waha?

Teoso tika wata kaminareka owa ni ya.




E kanamori ehebote tiwahani tike, tika wata ya. Tati oro toha, teme atabo toha, nenoka, watari tiwahari. Yati sonahanike teme ya. Ahabenoka, yati ihi, watari tiwahari.

E kanamori tati nima tite ama tike, oro tikiha tiwa. Bote tiharisi ya tihabi ya towisawa owa tohawehiba amaka tasa. Yama toyabo ya towisawa me tamaha me ahabi ya Teoso ka towisawa yosewehiba amaka. Teoso ka towisawa oharitehiba amaka waha. Yati nima Teoso ka towisawa nebonaka, e kanamori nahabiharo. Towisawa me one nafi nahabihiba amaka. Me ahabi nibama e kanamori ahabi nineke, tika wata ya yati ihi.



Afa amake, tikaminaharo. E kanamori e awaha himata nima tehani amari, e watamiharo?

Taniyeo tiwati amosake owa ni ya. Tika Teoso Teoso yokana tohe awaka, oko wata kaminenoho tiwa ni ya. Tika yamaba ta onahabana oke, e tabawahaba e. Yama me watoha me nafi tiyosehabone tike waha, owati ihi.





Taniyeo towisawa ati kaminematamonaka, he ya tataba me ni ya.

E ahabarabaha e amake, towisawa watari okomini karo.

Teoso amosaka.



Towisawa ya tataba Taniyeo me me nofaremetemoneke.

Soteo me amake. E ka teoso me nofara me awineke.

Himata nima e ribe waha? Towisawa me hinofarake kasiro ya. Era nonofaraba ne awaka, ha e.



Yama we one ya towisawa ati ehene me ka teoso kanamori me hiri nemetemoneke, ehebote. Ati ehene me nafi mowi kanisemetemoneke, teoso kanamori nokosi ya. Me mowi kanisi nofari ya me me sari hikanabone towisawa ati nematamonaka.

Taniyeo me one mowi kanisaraba me amake, soteo me tohi karo.

Towisawa ati ehene me me sari hikanaba me amake.



Me e kakatomahabanake, me e kaminaba mati towisawa ni ya.


Towisawa ati ehene me yoro tokowamehemetemoneke, me mowi kanamabone mati, teoso kanamori nokosi ya.

Hohori ati yana ni ya e mowi kanisaba e amake. Soteo me mowi kanisarahaba me amake.



Hohori ati yana nemetemoneke. Me nafi mowi kanisemetemoneke. Soteo me ta me mowi kanisarehemetemoneke. Sataraki toha, Mesaki toha, Abeteneko toha, nematamonaka, me mowi kanisara mati.

Me te awa ha. Me mowi kanisakere.





Me tamine me kaminemetemoneke towisawa ni ya.

Nabokotonoso soteo me mowi kanisarakake. Sataraki toha, Mesaki toha, Abeteneko toha, me narake, me mowi kanisara mati.

Me te kakama ahi.



Keye amarini? Te mowi kanisarahani te awine? Owati ihi hohori me hori namahabanake tasa. Hohori ati te miti ya te mowi kanisari ya owati ihi tera me sari kanahabanake.

Ota ahabi ya ota ahaba, nahi. Teoso otara kasome ya otara kasoma neba awaka. Ota mowi kanisarahaba otake, teoso kanamori nokosi ya.



Yifo te nananafinama nahi. Me te were towitihi, yifo hiri ni ya.



Me me wete hina, me me were hinehemetemoneke yifo hiri ni ya.

Towisawa me hiwehemetemoneke,
me nahoha mati, yifo hiri ni ya.

Me ahabakere. Me
ka owa sawimakeka
tasa.

Keye
amakereni.




Me ka owa sawihi Teoso
biti nima nareka.



Sataraki, Mesaki, Abeteneko te
kamahi.






Teoso ati ehene me
hatiremetemoneke. Me
kamehemetemoneke, towisawa me
ha hina mati.


Soteo me ka Teoso kitehino awaka. Me
ka Teoso e nofahaba eke waha, e nafi.
E ka one me ka Teoso me nofari ya
owati ihi me ahababa me amake.

Soteo me e
nofahaba eke
waha.



Yama soki one ya towisawa watamimatamonaka
tasa. Taniyeo ino hiri nematamonaka.

Taniyeo awa watari owahara
oke. Awa watari e awaha
himata nima e tehani e
amari?



Ee, okomina-
habanake,
Teoso ati
ehene.



Awa ehebote tiwahani tike, amosaro, tika wata ya. Fara awa nima tine tike, me nafi ka towisawa tiha tiwa. Tiwa tikahiyararabone Teoso ati nareka. Awa me ka nanike, tika wata ya. Fara awa nima tinahaba ama tike, me ka hinaharo, tiwa tikahiyari ya. Era e kahiyari Teoso nofakara.



Yama we one ya towisawa yaka nematamonaka hinaka yobe bari ya.



Babironiya amosake. Fara owati ihi me hiri hinahamaro amake, Babironiya. Otamineha ama oke.

Towisawa ati Teoso nofarematamonaka. Hiba hiyari fawa ne ya rabikematamonaka, Teoso ati ehene. Winawehimatamonaka yama kabani ya. Masiri kabehimatamonaka, bani nima nari. Hinaka faha fowe seti nemetemoneke, rabikari. Faha fowe seti na ahabi ya kitamematamonaka, Teoso ati ehene.



Soteo me ka Teoso Teoso yokana tohe awaka. Teoso kitate amaka mata ya. Yama hiyara hiri tere amaka, yama amosa hiri nari.



Nabokotonoso towisawa tohamatasehimatamonaka, Teoso ati ehene. Yama toyabo ya ahabematamonaka, bote tohahari. Towisawa owa tohawahimatamonaka. Inomatamona amaka, Besasa.



Yama we one ya Besasa ayaka hiri nematamonaka. Mera ha nematamonaka, me nafi tohaha mati. Fi me fawehemetemoneke, Teoso taboro ka kobo ya, Serosarei karo.




Me ayaka towisawa e yehe awehimatamonaka, yama hani rawi naro, neme ya, yama bari kani ya.

E yehe te awa ha, yama hani rawi naro.



E yehe te awa ha, yama hani rawi naro.

MENE MENE
TEREL UPHARSIN



Besasa he ya tataba mera aate nematamonaka, yama hani me kaminabone mati. Yama hani me nofaremetemoneke, me hiwatoraharo. Besasa mati me ati mitaha ati yana nemetemoneke.

Besasa Taniyeo tamine timatatera tiwa awine ti? Nabokotonoso ya fafama tohehimari amaka, yama watohari. Taniyeo te totimahi, yama hani ati kaminebana.

Te tonakamaho, yama hani awehibonaha.



Taniyeo me kakamemetemoneke.

Taniyeo yama hani ati tikaminahi owa ni ya. Yama hani ati tikamini ya tika yamaba ta onahabana oke. Makari toha, kowahatao toha, nabanake, oro tohaharo.

Tika yama onofa okere. Teoso ati e naka ahi, yama hani kari. Towisawa tihamarahaba ama tike. Besa ka me ka owa towisawa tohawehiba amaka, Teoso ati ehene.



Afa amake haro, tika kowahataobonehe, oro tohaharo. Yama tiwato tike.



Besa ka me tokiyomamakehemetemoneke, Besasa sawi ka yobe ya. Besasa me watehemetemoneke.

Hika me kiyomakehani me amari?



Besasa me nabowehemetemoneke. Besa ka towisawa inomatamona amaka, Tariyo.



Taniyeo e tabawahaba eke. Yama tiwato tike, kasiro ya.

Taniyeo Tariyo me ya tabawehimatamonaka. Tariyo ya tataba Taniyeo me nofaremetemoneke.

Taniyeo soteo amaka. Taniyeo e ka teoso mera nofi nofare amaka.

Towisawa hinofi hinofe amaka kasiro ya. Era nonofaraba ne awaka, ha e. Towisawa e keyehaba eke. Ati ehene Taniyeo me nahabihabanake.



Tariyo yama hani rawi tikanabone ota ati na otake. Yama hani ati e naboneke ahi. Abariko ota nahariabone otake, tiwa ota aate nabone ota, ota ka towisawa tiha tiwa, tiwaharia tiwa. Teoso me aate ni ota fawa nabone otake mata. E ka one teoso me me aate ni ya me kibehaboneke riyao me hoti ya, me ahababa mati, tiwati ihi, yama hani ati naboneke.

Ee, amosake. Owati ihi yama hani me rawi nabanake.




Tariyo ati ehene yama hani me rawi nemetemoneke. Yama hani ati me kaminemetemoneke, me nafi ni ya. Tariyo tataba me one Taniyeo me kakatomehemetemoneke, Teoso hiyarari.



Taniyeo te awa ha, hinaka teoso ha nari.

E kaminebanaka towisawa ni ya.



Tariyo tika yama hani ota awa otake. Tika yama hani ati e narake ahi. Teoso ota ha rabone ati narake. Afa ati ama? Keye amarini?

Ee, afa amake.



Taniyeo ota awa otake, hinaka teoso ha nari. Tiwati ihi foyehibanaka riyao me hoti ya.

Taniyeo ka teoso ha neno awa?

Owa me keyehanike, Taniyeo me wati kanahani mati.

Saotato Taniyeo me watehemetemoneke.



Taniyeo me tonakisehemetemoneke riyao me hoti ya.



Hoti te tofa kanahi, yati ya.

Taniyeo okasomahabone ona owa me kasawariharake. Yama hani e nahabiteramone amake.



Towisawa tafi nofarematamonaka, yawahari, Taniyeo tabiyo. Amo rematamonaka yama soki ya.



Hiba yama wa ni ya towisawa tokehimatamonaka, kita ya, riyao me hoti wai ya, Taniyeo tabiyo.

Yati te itihi.



Taniyeo tiwini? Tika Teoso tiwa kasomeno awa?





Teoso ati ehene riyao owa me nofararake.


Towisawa yayai nematamonaka. Ati ehene Taniyeo me itihemetemoneke. Me ini hiri nematamonaka, Taniyeo me nofara mati, riyao me me waka hinahabone mati.




Taniyeo te wati kanahani Taniyeo foyahareka, te ati ehene, ahabebonaha.

Me te te nahi, riyao me hoti ya.

Me ahabemetemoneke, riyao me ihi, Taniyeo me nofara mati. Me nafi towisawa hiyarematamonaka.



Owati ihi te nafi Taniyeo ka teoso te nofawahaba teke waha.



Esite ka hiyara
amake. Besa ka
towisawa owa
inomatamona
amaka Asowero.
Asowero ayaka hiri
nematamonaka.



Asowero ayaki
yabohareka.

Ee. Ayake ka
amo ni seti
nareka.

Ayaka ahabinima ni ya Asowero hanohi fati ini hiri nematamonaka.



Oko yibote te kakamahi, onamoahabonehe, amosi te awahabana.

Asowero fati me ha nemetemoneke, Asowero nanarifa mati.

Asowero fati ati tamine mite yawehimatamonaka. Mera aate nematamonaka, he ya tataba mati. Himata hiri oribe waha, ati nematamonaka.

Owa namo onofarini, e hanoha ni ya.



Asowero tika yibote ihi hiyakere, tiwati nofararo. Tika yibote ati tamine me fanawiri miti ya me makiti ati nofaraba amake.





Ee, tiwati amosake owa ni ya. Oko yibote owamarahabana oke.

Me fanawi ota siba naba otake, tika yibotebana.

Soteo me ka owa inomatamona amaka, Motekai, winahari Babironiya ya. Motekai matise bite Esite tohaha nanayana tohehimatamonaka.

Esite towisawa nanarifa tiwini hiri nareka, towisawa tiwa awe ya titamini ya tiwa itihibonaha. Titaminate ama tike kasiro ya.

E awarini. Owa itireba awane, soteo ohi karo.

Me fanawi me siba na me hiwasirawa me hikatikarawehemetemoneke, oharia Asowero hitihabonehe, amosaro.



Tiwa tikaminarabana tike, soteo tiha tiwa.

Esite sawihemetemoneke Asowero taboro ya, me fanawi one ya tabaharo. Motekai fara yama we nima yobi ni na tohehimatamonaka towisawa taboro beheri ya, Esite tamine mitehibonaha.



Towisawa Esite nofehiba ama?

Asowero Esite
nofehimatamonaka
kasiro ya, amosaro.
Hitihemetemoneke
waha.

Esite tiwa otihabone
oke.

Ee, tiwa
onofini.



Motekai fara yama we
nima yobi ni na
tohehimatamonaka
towisawa taboro beheri
ya, Esite tamine
mithehibonaha.

Esite Asowero
fati tohawake
waha,
hiwatoraharo,
soteo tohaharo.



Esite Asowero fati tohawake waha, hiwatoraharo, soteo tohaharo.

Towisawa e nahabihaminaba eke.

Ee hima. Era me watoraba me awineke.



Motekai me ati mite hiyara kaminematamonaka Esite ni ya. Me ati tamine Esite mitaha hiyara kaminemetemoneke Asowero ni ya.

Hike hiyara kaminarano tiwa ni ya?

Motekai hiyara hikamina amani, me ati mitehimonaha.



Towisawa ati ehene me me waka hinehemetemoneke, he nanarifa mati, me famaha mati.

Motekai ino rawi tikanahi, ati ehene hasi ona owa, ino kasawitehibonaha yama hani ya.



Me ka owa inomatamona amaka, Ama, Asowero ya tataba owa. Yama we one ya Asowero ati ehene me nafi yoyose tohawe himatamonaka, Ama.

Ama me nafi tiyoseabana tike waha, owati ihi, me nafi mowi kanisaba mati tinokosi ya.

Ee, tiwati amosake.





Ama nokosi ya me mowi
kanamemetemoneke.
Motekai ta mowi
nisarematamonaka.

Me one Motekai yofi
kanahemetemoneke Ama ni ya, mowi nisarari.



Ino e ne amara?

Motekai amaka.
Soteo amaka.



Soteo me onofatera ama
oke, soteo me nafi.


Ama yawe soteo me nafi ahababone ati nematamonaka. Asowero keyehbona ati nematamonaka, soteo me me nahabihabone mera yosehibonaha. Asowero narabo nima nematamonaka.

Ee Ama. Me tiyosehi, me me nahabihaba mati.


Asowero bara tiwati nima me rarake, tiwati me nofi nofara mati. Owati ihi me nafi ahababanake.



Yama hani rawi tikanahi. "Abariko owa ya soteo me nafi te nahabihaba teke. Me te nahabi ya me ka yama te kakamiyahi, te ka yamabana." Yama hani tikaminahabana tike, me hiwatowahabonehe.



Soteo me nafi kakomehemetemoneke, Ama ka yama hani me awa mati.



Motekai Ama ka yama hani tamine mite yawehimatamonaka. Makari sako tohaha weye nematamonaka. Tati mata kana, nematamonaka yifo nakosiri ya, yawahari.



Esite Motekai awehemetemoneke, yawahari.



Ama ka yama hani tikaminahabone tike Esite ni ya, soteo me nafi wati kanahari. Esite warabi nima tinahi, towisawa aate nabana, otara kasomebonaha. Ota ahabariyahi.



Esite nanarifa Motekai ati kaminemetemoneke Esite ni ya.

Tokomaki onofarara oke. Ohabariyahi. Asowero onakomeha oke. Towisawa era ha re ya towisawa ni ya e tokomaki ya e ahabate e amake, ati hiyare ya, towisawa ati ehene. Asowero owa ha rareka. Owati tikaminamahabone tike Motekai ni ya.



Esite nanarifa tokomemetemoneke Motekai ni ya tasa. Esite ati kaminemetemoneke Motekai ni ya.

Tiwati e nabana tike ahi. Esite tihabaraha ama tike. Teoso tiwa kakatomehiba amaka, tihabaraba tiwa. Teoso e nafi kasomeba amaka.



Motekai ati tamine Esite mitehemetemoneke. Tokomakehabone ati nemetemoneke waha, towisawa aate nabonehe.

Oko makari tekamahi, amosaro.

Towisawa tiwa nofehiba ama ti?



Esite
tokomakehemetemoneke.

Himata Esite ebe
nani amari?



Esite nabowi nofarematamonaka, hinofi karo. Ati amosematamonaka.

Asowero e tafi famahabone onahara oke. Ama toha, nebona onahara oke, e tafi tabibonehe.



Ama yayai nematamonaka, Esite ha hinahari, tafehibonaha. Tokomake Motekai itari awehimatamonaka, towisawa taboro beheri ya.

Ama kobo name Motekai ehene kaminematamonaka fati ni ya.

Motekai mowi nisi nofakara owa ni ya. Ahabeba amaka, me ya tabahari, soteo me nafi.

Ama Motekai tinabowayaho, ehene hiyarari. Tinawinayaho neme ya, namiti baka tonehibana.

Tiwati amosake owa ni ya. Awa hiri onahabone oke, Motekai onawinahabone owa. Towisawa aate onahabone oke, Motekai onabowahabone owa



Yama soki ya towisawa tonoko nabehimatamonaka, amo hinarari. Ati ehene he nanarifa yama hani ati kaminematamonaka he ni ya, me nafi tamine. Motekai ehenemari kaminematamonaka, yama hani karo, towisawa kasomemarihi, towisawa ahabenaha.



Himata yama ta orimete he ni ya, owa kasomemarihi?

Yama ta tirahamaro ama tike.

Ama tokiyomamematamonaka towisawa ka yobe ya, towisawa aate nebonaha, Motekai nabowebonaha.



Ama tiwa aate onahabone onahara oke. E ka owa ehene amosareka. Himata ta oribe he ni ya, ehene amosari?

Towisawa owa kamine awaka. Towisawa oko yamabone ta nebona ati ne awaka.

Makari ta tinahabone onahara oke, amosaro. Tiwati ihi tika kafaro yaka kanehibonaka. E ka owa kafaro horo kanehibonaka sitati baikani ya, me hiwehibonaha, me nafi. E ka owa ati e neba amaka ahi.

"E ka owa te awa ha, towisawa ka kafaro yaka kanahari, towisawa hinofari."



Tiwati amosake owa ni ya. Motekai amaka, okominahari. Motekai oko kafaro yaka kanehibona onahara oke, onofari. Kafaro horo tinahabone tike, ha tiwa, sitati baikani ya.

Ee, siba raba awineke.



Towisawa ati ehene Ama Motekai horo kanehimatamonaka sitati baikani ya, me nafi hiwehibonaha. Ama ati e nematamonaka ahi. "Efe amaka, Motekai, towisawa hinofari," ati nematamonaka.



Kafaro horo ni ahabe ya Ama tokomematamonaka fare taboro ya. Motekai kaminematamonaka fati ni ya, yawahari.

Ama towisawa Motekai nofe awaka. Himata ebe tiribe, ha tiwa, waha?

E awakere. Motekai onabowehibona owa kasawarihareka.



Yama soki ya me tafehemetemoneke Esite tabori ya, Esite me ha hina mati.

Esite himata ebe onahaba owa tirini, otafaba owa titaboro ya? Owa aate tibana?

Ee, tiwa aate onahabone onahara oke.





Himata tikaminaribe owa ni ya?

Owa okominahabone onahara oke, ohabarahabone owa. Ota ka one me ahabarihi naboneke, onahara oke. Te ka owa otara nahabihibona ati nareka, ota nafi.




Hikari? Habo bayi awaka. Ama amaka


Asowero tokomematamonaka hibati ya, yawahari. Ama Esite narabi nima nematamonaka, he kasomabonehe.



Esite owa tikasomahi. Towisawa owa nabowarayaho.



Ama noko me karafemetemoneke makari ya, ahabemona me hinehibonaha.




Asowero awa
Ama hire
nemonaka,
Motekai
nawinebonaha.

Fare winehiba
amaka fara
hinaka awa ya,
ahabebana.




Esite Ama ka yama
tihawahabana tike,
ahabari.

Motekai owa
asima ne awaka.



Motekai tiwa asima ne awa?
Motekai ota famawahaba ota
amake waha.



Towisawa narabo Esite nima nemetemoneke tasa.

Asowero tika yama hani nasa
narake, Ama ya te famaha te
hiri namaroho. Himata nima
ota naba ota amari? Ota
ahabi onofa okere.

Yama hani nahabitera
amake. Himata nima
oribe waha?

Yama hani one rawi okanabana oke tasa.



Yama hani one towisawa rawi kanehimatamonaka tasa me hiwahabonehe.

Towisawa ka yama hani te awa ha. Ati e nareka ahi. Soteo me e mowa ni ya soteo era me mowa nabone ati nareka.

Towisawa soteo mera nofe awaka. Me onofawahabanake waha.



Abariko owa ya me abe mowa nemetemoneke. Soteo me ahabaremetemoneke.


Yama we one ya Motekai yama hani rawi kanehimatamonaka.

Esite yama hani rawi onahara oke. E nafi ayakabone onahara oke, Teoso era kasome karo. Fara faha fowe nima e ayaki teba e amake.



Fara fa fowe nima soteo me ayaki te me amake faha fowe enoki ya, Esite me wati nawaha mati.

Sota me wiwina tohehemetemoneke Babironiya ya. Yama toyabo ya Babironiya ka Besa ka me me mowa nemetemoneke. Babironiya ka me kitaremetemoneke, Besa ka me ihi. Besa ka me tabori tohawehemetemoneke, Babironiya waha.



Besa me ka towisawa inomatamona amaka, Siro. Siro kakehimatamonaka Babironiya ya. Sota ka me hiwehimatamonaka.


Siro yahatehiba ama e ni ya?

E awakere. Yahatehiba awaka.



Yama totoyabo ni ya Siro nanarifa Sota me narabi nima nematamonaka, Siro ati ehene.

Siro ati e nareka ahi. Te tokomaba teke Sota ya. Teoso ka yobe te hiri namahaba teke Serosarei kari.



Okobi taboro owahaba ama oke waha, Serosarei.

Siro atimona me mitaha me one tokomemetemoneke Sota ya. Me one ta sawisa nemetemoneke Babironiya ya. Fara me one tokoma me ka yinerobona me ta nemetemoneke, me nahoha mati Babironiya ya bisa. Me banaha me yana tonehemetemoneke.

Me yaka nemetemoneke hawi ya.

Me kobo tonamemetemoneke Serosarei ya.
Serosarei me awaha yobe watare ehene me ati
kamoniemetemoneke, me ohi nima na mati.



Serosarei me sari
kanehemetemone
me ati te me
amake. Yobe
yati e hiri naba
eke.



Teoso ka yobe
taboromatamona amaka
hari, Saromao hiri
hinehimatamonaha.

Hibaka oko
yobe warehiba
ama ori?



E wiwinaba watakere
ahi. Yama
winarawineke haro.

Sitatiba e hiri
namahaba ama?



Hima e hiri namahabanake,
Serosareibana.

Teoso ka yobebona me hiri
namahabone me ati
nemetemoneke. Hiba yobe hiri
ni me yayana tokana ni ya
Teoso me ha nemetemoneke.

Teoso amosaka, era
kakatomahari.



Samariya ka bara me kakehemetemoneke. Teoso ka yobe me hiri na me ya me tabahabone me ati nemetemoneke.



Siro ahabematamonaka. Besa ka towisawa tohawahimatamonaka. Towisawa owa inomatamona amaka, Atasesi. Faya yama hani me rawi kanehemetemoneke, Samariya ka mati, Atasesi ka yama hanibonehe, Atasesi hiwahabonehe. Atasesi me aate nemetemoneke, yama hani rawi kanehibonaha, Sota ka me yama hanibonehe. Atasesi nanarifa kakehimatamonaka Serosarei ya.



Teoso ka yobe me hiri namaremetemoneke.

Abi himataba Atasesi era hora kasara?

Samariya ka me ihi amake, yama hani me rawi kanahani mati, Atasesi ka yama hanibonehe. Keye me hiri nanike, Besa e mowa nabone e ati namone me ati nanike.



Yama totoyabo ni ya Atasesi ahabematamonaka. Yama toyabo ya Teoso ka yobe me hiri namehemetemoneke tasa, Teoso ati kakamina me ati ihi.

Aseo, Sakariya. Himata te ebe na te kakineri?

Hiyara ota kaminabone otake.

Besa ka towisawa owa nareka. Inomona amaka, Tariyo. Teoso ka yobe te hiri namahabone ota ati na otake. Tariyo ati amoseba awaka.



Tariyo me tamine mite ati amosematamonaka. Yinero ta nematamonaka, me ka yamatabone kanikibone karo, Teoso ka yobe me hiri na mati.

Teoso ka yobe hawa tohehimatamonaka. Me yayai nemetemoneke.



Serosarei ka yama bari kani wataremetemoneke. Me kakomemetemoneke, yama bari kani watari karo.

Sota me ka owa Nehemiya tohe wiwina tohehimatamonaka Besa ya. Serosarei ka yama bari kani wataramone tamine mite kakehimatamonaka Serosarei ya. Me hiwatorehimatamonaka.



Yama soki ya Nehemiya yama bari
kani ki nematamonaka, he nanarifa
famahari.

Fara me ati nima yama
bari kani nineke. Yama
bari kani hiyakere.

Nehemiya yama bari kani
nafihemete baka kanineke.



Yama we one ya Nehemiya mera hiyarematamonaka, Serosarei ka mati.

Yama bari kani owaha baka kanaharake. E hiri namahabanake.

Hibake ati ehene e hiri namahaba amari?



Besa ka towisawa ati ehene amaka. Besa ya wiwina oha yama bari kani tamine omita towisawa aate onahara oke, yama bari kani e hiri namahabone e.

Tiwati amosake. Yama e bari kanamaba eke.



Yama bari kani me kanawanamemetemoneke tasa.



Serosarei yabori ka bara me me hinofarehemetemoneke, Serosarei me bari kana mati.

Yama bari kani me kiji ya me kitahaba me amake.

Hima me e mowa nibeya, yama bari kani me kihariyahi.



Bara me ati tamine Nehemiya mite me narabi nima nematamonaka, Serosarei ka mati.



Bara me kakeha me ye honaha me me awaha me fari tonamemetemoneke, me me nakomeha mati.



Yama totoyabo ni ya yama bari kani hawa tohehemetemoneke.

